

摘藻堂四庫全書薈要

史部

欽定四庫全書薈要卷六千八百六十八

史部

明史卷二百七十五

大學士張廷玉等奉 敕修

列傳第一百六十三

張慎言

徐石麟

解學龍

高倬

黃端伯等

左懋第

祁彪佳

張慎言字金銘陽城人祖昇河南參政慎言舉萬曆三

十八年進士除壽張知縣有能聲調繁曹縣出庫銀糴粟備振連值荒歲民賴以濟泰昌時擢御史踰月熹宗即位時方會議三案慎言言皇祖召諭百工不究張差黨與所以全父子之情然必摘發奸謀所以明君臣之義至先皇踐阼蠱惑之計方行藥餌之奸旋發崔文昇投涼劑於積憊之餘李可灼進紅丸於大漸之際法當駢首恩反賜金誰秉國成一至此極若夫鼎湖再泣宗廟之鼎鬯為重則先帝之簪履為輕雖神廟鄭妃且先

徙以為望選侍不即移宮計將安待無何賈繼春以請
安選侍被譴慎言抗疏救之帝怒奪俸二年天啟初出
督畿輔屯田言天津靜海興濟間沃野萬頃可墾為田
近同知盧觀象墾田三千餘畝其溝洫廬舍之制種植
疏濬之方犁然具備可倣而行因列上官種佃種民種
軍種屯種五法又言廣寧失守遼人轉徙入關者不下
百萬宜召集津門以無家之衆墾不耕之田便詔從之
嘗疏薦趙南星劾馮銓銓大恨五年三月慎言假歸銓

屬曹欽程論劾誣盜曹縣庫銀三千遂下撫按徵贓編
戍肅州莊烈帝即位赦免崇禎元年起故官會營京察
請先治媚璫者附逆之罪其他始付考功報可旋擢太
僕少卿歷太常卿刑部右侍郎讞耿如杞獄不稱旨并
尚書韓繼思下吏尋落職歸久之召為工部右侍郎國
用不支廷議開採鼓鑄屯田鹽法諸事慎言屢疏陳奏
悉根本計大學士楊嗣昌議改府州縣佐為練備練總
慎言以更制事大歷陳八議其後卒不能行由左侍郎

遷南京戶部尚書七疏引疾不允就改吏部尚書掌右
都御史事十七年三月京師陷五月福王立於南京命
慎言理部事上中興十議曰節鎮曰親藩曰開屯曰叛
逆曰偽命曰褒卹曰功賞曰起廢曰懲貪曰漕稅皆嘉
納時大起廢籍慎言薦吳甡鄭三俊命甡陞見三俊不
許大學士高弘圖所擬也勲臣劉孔昭趙之龍等一日
朝罷羣詬於廷指慎言及甡為奸邪叱咤徹殿陞給事
中羅萬象言慎言平生具在甡素有清望安得指為奸

邪孔昭等伏地痛哭謂慎言舉用文臣不及武臣鬪爭
不已又疏劾慎言極詆三俊且謂慎言當迎立時阻難
懷二心乞寢牲陸見命且議慎言欺蔽罪慎言疏辨因
乞休萬象又言首膺封爵者四鎮也新改京營又加二
鎮銜何嘗不用武年來封疆之法先帝多寬武臣武臣
報先帝者安在祖制以票擬歸閣臣參駁歸言官不聞
委勲臣以糾劾也使勲臣得兼糾劾文臣可勝逐哉史
可法奏慎言疏薦無不當諸臣痛哭喧呼滅絕法紀恐

驕弁悍卒益輕朝廷御史王孫蕃言用人吏部職掌奈何廷辱冢宰弘圖等亦以不能戢和文武各疏乞休不允姓既不出慎言乞休得請加太子太保廕一子山西盡陷於賊慎言無家可歸流寓蕪湖宣城間國亡後疽發於背戒勿藥卒年六十九慎言少喪二親鞠於祖母及為御史訃聞引義乞歸執喪三年以報子履旋舉崇禎十五年鄉試賊陷陽城投崖死事聞贈御史

徐石麒麟字寶摩嘉興人天啟二年進士授工部營繕主

事筦節慎庫魏忠寶兼領惜薪司所需悉從庫發石麒
輒持故事格之其黨譟於庭不為動御史黃尊素坐忤
忠賢下詔獄石麒為盡力忠賢怒執新城侯王昇子下
獄令誣賄石麒捕繫其家人勒完贖而削其籍崇禎三
年起南京禮部主事就遷考功郎中八年佐尚書鄭三
俊京察澄汰至公厯尚寶卿應天府丞十一年春入賀
三俊時為刑部尚書議侯恂獄不中得罪石麒疏救釋
之石麒官南京十餘年至是始入為左通政累遷光祿

卿通政使十五年擢刑部右侍郎讞吏部尚書李日宣等獄帝曰枚卜大典日宣稱誦徇私石麒予輕比貶二秩先是會推閣臣日宣一再推因及副都御史房可壯工部右侍郎宋玫大理寺卿張三謨石麒與焉召對便殿石麒獨不赴及是帝怒戌日宣及吏部都給事中章正宸何南道御史張瑄奪可壯玫三謨及讞獄左侍郎惠世揚官石麒代世揚掌部事旋進左當是時帝以威刑馭下法官引律大抵深文附會予重比石麒奉命清

獄推明律意校正今斷獄之不合於律者十餘章先以白同官以次審理十三司因多寬減然廉公一時大法赫然無敢倖免者兵部尚書陳新甲下獄朝士多營救石麒持之曰人臣無境外交未有身在朝廷不告君父而專擅便宜者新甲私款辱國當失陷城寨律斬帝曰未中可覆擬乃論新甲陷邊城四陷腹城七十二陷親藩七從來未有之奇禍當臨敵缺乏不依期進兵策應因而失誤軍機者斬奏上新甲棄市新甲黨皆大恨石

麒尋擢本部尚書中官王裕民坐劉元斌黨元斌縱軍
淫掠伏誅裕民以欺隱不舉下獄帝欲殺之初令三法
司同鞫後專付刑部石麒議戊烟瘴奏成署院寺名以
進帝怒其失出召詰都御史劉宗周對曰此獄非臣讞
徐曰臣雖不與聞然閱讞詞已曲盡情事刑官所執者
法耳法如是止石麒非私裕民也帝曰此奴欺罔實甚
卿等焉知令石麒改讞詞棄之市無何宗周以救姜採
熊開元獲嚴譴僉都御史金光辰救之奪職石麒再疏

留不納採開元既下詔獄移刑部定罪石麒據原詞擬
開元贖徒採謫戍不復鞠訊帝責對狀石麒援故事對
帝大怒除司官三人名石麒落職閒住福王監國召拜
右都御史未任改吏部尚書奏陳省庶官慎破格行久
任重名器嚴起廢明保舉交堂廉七事時方考選與都
御史劉宗周矢公甄別以年例出御史黃耳昂給事中
陸朗於外朗賄奄人得留用石麒發其罪朗恚詆石麒
石麒稱疾乞休耳昂亦兩劾之石麒發其罪枉殺陳新

甲石麒疏辯求去益力馬士英擬嚴旨福王不許命馳
驛歸石麒剛方清介扼於權奸悒悒不得志士英挾定
策功將圖封石麒議格之中官田成輩納賄請囑石麒
悉拒不應由是中外皆怨構之去去後以登極恩加太
子太保明年南都亡石麒時居郡城外城將破石麒曰
吾大臣也城亡與亡復入居城中以閏月二十六日朝
服自縊死年六十有八

解學龍字石帆揚州興化人萬曆四十一年進士歷金

華東昌二府推官天啟二年擢刑科給事中遼東難民
多渡海聚登州招練副使劉國縉請帑金十萬振之多
所乾沒學龍三疏發其弊國縉遂獲譴王紀忤魏忠賢
削籍學龍言紀亮節弘猷召寘廊廟必能表正百寮裁
決大務失忠賢意不報已劾川貴舊總督張我續貪淫
漏網新總督楊述中縮朒卸責帝不罪學龍通曉政務
上言遼左額兵舊九萬四千有奇歲餉四十餘萬今關
上兵止十餘萬月餉乃二十二萬遼兵盡潰闕門宜募

新民薊鎮舊有額兵乃亦給厚糈召募舊兵以其餉厚
悉竄入新營而舊額又如故漏卮可騰言國初文職五
千四百有竒武職二萬八千有竒神祖時文增至一萬
六千餘武增至八萬二千餘矣今不知又增幾倍誠度
冗者汰之歲可得餉數十萬裁冗吏核曠卒俾衛所應
襲子弟襲職而不給俸又可得數十萬京邊米一石民
輸則非一石也以民之費與國之收衷之國之一民之
三關餉一解銀四錢以易錢則好米值錢百惡米止三

四十錢又其下腐臭不可食以國之費與兵之食衷之
兵之一國之三總計之民費其六而兵食其一况小民
作奸欺漕卒漕卒欺官司官司欺天子展轉相欺米已
化為糠粃沙土兼濕熱蒸變食不可咽是又化有用之
六為無用之一矣臣以為莫如修屯政屯政修則地闢
而民有樂土粟積而人有固志昔吳璘守天水縱橫鑿
渠綿亘不絕名曰地網敵騎不能逞今倣其制溝涂之
界各樹土所宜木小可獲薪果之饒大可得抗扼之利

敵雖強何施乎帝亟下所司而議竟中格稍進右給事中五年九月御史智鋌劾學龍及編修侯格為東林鷹犬遂削籍崇禎元年起厯戶科都給事中以民貧盜起請大清吏治尋劾薊撫王應豸尅餉激變又上足餉十六事帝皆採納遷太常少卿太僕卿五年改右僉都御史巡撫江西疏言臣所部州縣七十八而坐逋賦降罰者至九十人由數歲之逋責於一歲數人之逋責於一人故終無及額之日也請別新舊酌多寡立帶徵之法

可之四方盜賊蠡起江西獨無重兵學龍以為言詔增置千人討平都昌萍鄉諸盜合閩兵擊破封山妖賊張普薇等賊遂殄滅十二年冬擢南京兵部右侍郎明年春將解任遵例薦舉屬吏并及遷謫官黃道周帝怒徵下獄責其黨庇行私廷杖八十削其籍移入詔獄竟坐遣戍十五年秋季道周召還半道請釋學龍不聽十七年五月福王立於南京召拜兵部左侍郎十月擢刑部尚書時方治從賊之獄倣唐制六等定罪學龍議定以十

二月上之其一等應礫者吏部員外郎宋企郊舉人牛
金星平陽知府張嶙然太僕少卿曹欽程御史李振聲
喻上猷山西提學叅議黎志陞陝西左布政使陸之祺
兵科給事中高翔漢潼關道僉事楊王休翰林院檢討
劉世芳十一人也二等應斬秋決者刑科給事中光時
亨河南提學僉事鞏煇庶吉士周鍾兵部主事方允昌
四人也三等應絞擬贖者翰林修撰兼戶兵二科都給
事中陳名夏戶科給事中楊枝起廖國遴襄陽知府王

承曾天津兵備副使原毓宗庶吉士何孕光少詹事項
煜七人也四等應戊擬贖者禮部主事王孫蕙翰林院
檢討梁兆陽大理寺正錢位坤總督侍郎侯恂山西副
使王秉鑑御史陳羽白裴希度張懋爵禮部郎中劉大
鞏吏部員外郎郭萬象給事中申芝芳金汝勵舉人吳
達修撰楊廷鑑及黃繼祖十五人也五等應徒擬贖者
通政司參議宋學顯諭德方拱乾工部主事繆沅給事
中呂兆龍傅振鐸進士吳剛思檢討方以智傅昂銓庶

吉士張家玉及沈元龍十人也六等應杖擬贖者工部

員外郎潘同春禮部員外郎吳泰來主事張琦行人王

于曜行取知縣周壽明進士徐家麟及向列星李桐八

人也其留壯俟後定奪者少詹事何瑞徵楊觀光太僕

少卿張若麒副使方大猷戶部侍郎黨崇雅吏部侍郎

熊文舉太僕卿葉初春給事中龔鼎孳戴明說孫承澤

劉昌御史涂必泓張鳴駿司舉薛所蘊通政叅議趙京

任編修高爾儼戶部郎中衛周祚及黃紀孫襄十九人

也其另存再議者給事中翁元益郭克庶吉士魯稟吳爾璵史可程王自超白孕謙梁清標楊棲鶚張元琳呂崇烈李化麟朱積趙頰劉廷琮吏部郎中侯佐員外郎左懋泰禮部郎中吳之琦兵部員外郎鄒明魁行人許作梅進士胡顯太常博士龔懋熙及王之牧王皋梅鶚姬琨朱國壽吳嵩孕二十八人也其已奉旨錄用者兵部尚書張縉彥給事中時敏諭德衛孕文韓四維御史蘇京行取知縣黃國琦施鳳儀兵部郎中張正聲內閣

中書舍人顧大成及姜荃林等十人也得旨周鍾等不當緩決陳名夏等未蔽厥辜侯恂宋學顯吳剛思方以智潘同春等擬罪未合新榜進士盡污偽命不當復玷班聯令再議惟方拱乾結納馬阮特旨免其罪明年正月學龍奉詔擬周鍾光時亨等各加一等潘同春諸臣皆候補小臣受偽無據仍執前律當是時馬阮必欲殺周鍾學龍欲緩其死謀之次輔王鐸乘士英注籍上之且請停刑鐸即擬俞旨褒以詳慎平允士英聞之大怒

然事已無及大鉞暨其黨張捷楊維垣聲言欲劾學龍
學龍引疾命未下保國公朱國弼御史張孫振等詆其
曲庇行私遂削籍大鉞既殺鍾時亨即傳旨二等罪斬
者謫充雲南金齒軍三等罪絞者充廣西邊衛軍四等
以下俱為民永不叙用然學龍所定案亦多漏網而所
擬一等諸犯皆隨賊西行實未嘗正刑辟也黃繼祖沈
元龍向列星李柵黃紀孫襄王之牧王皋梅鷄姬琨朱
國壽吳嵩孕姜荃林皆未詳其官學龍歸南都旋失久

之卒於家

高倬字枝樓忠州人天啟五年進士除德清知縣調金華崇禎四年徵授御史薊遼總督曹文衡與總監鄧希詔相訐奏詔殫力幹濟以副委任倬乃上疏言文衡骯髒成性必不能仰鼻息於中官希詔睚眦未忘何能化戈矛為同氣封疆事重宜撤希詔安文衡心若文衡不足用宜更置勿使中官參之諸邊鎮臣如希詔不少使人效希詔督撫之展布益難即諸邊督撫如文衡亦不

少使人效文衡將邊事之廢壞愈甚疏入貶一秩視事
巡視草場坐失火下吏廷臣申救不納逾年熱審給事
中吳甘來以為言始釋歸起上林署丞稍遷大理右寺
副十一年五月火星逆行詔修省倬以近者刑獄滋繁
法官務停閣請敕諸司尅期奏報大者旬小者五日其
奉旨覆讞者或五日三日務俾積案盡疏罔罔衰減帝
為採納屢遷南京大僕卿太僕故駐滁州滁為南都西
北門戶請募州人為兵保障鄉土從之十六年二月擢

右僉都御史提督操江其秋操江改任武臣劉孔昭召倬別用未赴而京師陷福王立南京拜倬工部右侍郎

御用監內官請給工料銀置龍鳳几榻諸器物及宮殿陳設金玉諸寶計貲數十萬倬請裁省光祿寺辦御用器至萬五千七百有奇倬又以為言皆不納明年二月由左侍郎拜刑部尚書國破倬投繯死是時大臣殉難者倬與張捷楊維垣庶僚則有黃端伯劉成治吳嘉允龔廷祥瑞伯字元公建昌新城人崇禎元年進士歷寧

波杭州二府推官行取赴都母憂歸服闋入都疏陳益
王居建昌不法狀王亦劾端伯離間親藩及出妻酗酒
諸事有詔候勘避居廬山福王立大學士姜曰廣薦起
之明年三月授儀制主事五月南都破百官皆迎降端
伯不出捕繫之閔四月諭之降不從卒就戮成治字廣
如漢陽人崇禎七年進士福王時厯官戶部郎中國破
析城伯趙之龍將出降入戶部封府庫成治憤手搏之
之龍跳而免成治自經嘉允字繩如松江華亭人由鄉

舉歷官戶部主事奉使出都聞變還謁方孝儒祠投繯
死廷祥字伯興無錫人馬世奇門人也崇禎十六年進
士為中書舍人城破衣冠步至武定橋投水死時又有
欽天監博士陳于階國子生吳可箕武舉黃金璽布衣
陳士達並死焉

左懋第字蘿石萊陽人崇禎四年進士授韓城知縣有
異政遭父喪三年不入內寢事母盡孝十二年擢戶科
給事中疏陳四弊謂民困兵弱臣工委頓國計虛耗也

又陳賁粟之策令天下贖罪者盡輸粟鹽筴復開中之
舊令輸粟邊塞充軍食彗星見詔停刑懋第請馬上速
傳又請嚴禁將士剽掠有司朘削請散米錢振輦下饑
民收養嬰孩明年正月勦餉罷徵亦請馬上速行恐遠
方吏不知先已徵民不沾實惠帝並採納三月大風霾
帝布袍齋居禱之不止懋第言去秋星變朝停刑而夕
即滅今者不然豈陛下有其文未修其寶乎臣敢以實
進練餉之加原非得已乃明旨減兵以省餉天下共知

之而餉猶未省何也請自今因兵徵餉預使天下知應加之數官吏無所逞其奸以信陛下之明詔而刑獄則以睿慮之疑信定諸囚之死生諸疑於心與疑信半者悉從輕典豈停刑可止葦解網不可以返風乎且陛下屢沛大恩四方死者猶枕藉盜賊未見衰止何也由蠲停者止一二存留之賦有司迫考成催徵未敢緩是以莫救於凶荒請於極荒州縣下詔速停有司息訟專以救荒為務帝曰然於是上災七十五州縣新舊練三餉

並停中災六十八州縣止徵練餉下災二十八州縣秋
成督徵十四年督催漕運道中馳疏言臣自靜海抵臨
清見人民饑死者三疫死者三為盜者四米石銀二十
四兩人死取以食惟聖明垂念又言臣自魚臺至南陽
流寇殺戮村市為墟其他饑疫死者屍積水涯河為不
流振捄安可不速已又陳安民息盜之策請核荒田察
逋戶予以有生之樂鼓其耕種之心又言臣有事河干
一載每進父老問疾苦皆言練餉之害三年來農怨於

野商嘆於途如此重派所練何兵兵在何所勦賊禦邊
效安在奈何使衆心瓦解一至此極乎又言臣去冬抵
宿遷見督漕臣史可法言山東米石二十兩而河南乃
至百五十兩漕儲多逋朝議不收拆色需本色今淮鳳
間麥大熟如收兩地折色易麥轉輸豈不大利昔劉晏
有轉易之法今歲河北大稔山東東兗二郡亦有收誠
出內帑二三十萬分發所司及時收糴於國計便帝即
命議行屢遷刑科左給事中十六年秋出察江防明年

五月福王立進兵科都給事中旋擢右僉都御史巡撫
應天徽州諸府時

大清兵連破李自成朝議遣使通好而難其人懋第母
陳沒於燕懋第欲因是返匱葬請行乃拜懋第兵部右
侍郎兼右僉都御史與左都督陳弘範太僕少卿馬紹
愉偕而令懋第經理河北聯絡關東諸軍馬紹愉者故
兵部郎官也嘗為陳新甲通款事至義州而還新甲既
誅紹愉以督戰致劾為懋第劾罷及是紹愉已起官郎

中乃進為少卿副懋第懋第言臣此行致祭先帝后梓
宮訪東宮二王蹤跡臣既充使臣勢不能兼理封疆且
紹愉臣所劾罷不當復與臣共事必用臣經理則乞命
弘範同紹愉出使而假臣一旅偕山東撫臣收拾山東
以待不敢復言北行如用臣與弘範北行則去臣經理
但銜命而往而罷紹愉勿遣閣部議止紹愉改命原任
薊督王永吉王令仍遵前諭懋第瀕行言臣此行生死
未卜請以辭闕之身效一言願陛下以先帝仇恥為心

瞻高皇之弓劍則思成祖列聖之陵寢何存撫江上之
殘黎則念河北山東之赤子誰卹更望時時整頓士馬
必能渡河而戰始能扼河而守必能扼河而守始能畫
江而安衆聽其言王令齎白金十萬兩幣帛數萬匹以
兵三千人護行八月舟渡淮十月朔次張家灣

本朝傳令止許百人從行懋第衰經入都門至則館之
鴻臚寺請祭告諸陵及改葬先帝不可則陳太宰於旅
所哭而奠之即以是月二十有八日遣還出都弘範乃

請身赴江南招諸將劉澤清等降附而留懋第等勿遣於是自滄州追還懋第改館太醫院

順治二年六月聞南京失守慟哭其從弟懋泰先為吏部員外郎降賊後歸

本朝授官矣來謁懋第曰此非吾弟也叱出之至閏月十二日與從行兵部司務陳用極游擊王一斌都司張良佐劉統王廷佐俱以不降誅而紹愉獲免

祁彪佳字弘吉浙江山陰人祖父世清白吏彪佳生而

英特丰姿絕人弱冠第天啟二年進士授興化府推官
始至吏民易其年少及治事剖決精明皆大畏服外艱
歸崇禎四年起御史疏陳賞罰之要言黜功因一級疑
稽三年之叙且恩及督撫總帥帷幄大臣而陷敵衝鋒
之士不預何以勵行間山東之變六城連陷未嘗議及
一官欺蒙之習不可不破帝即命議行又言九列之長
詰責時聞四朝遺老或蒙重譴諸臣怵嚴威競迎合以
保名位臣所慮於大臣者此也方伯或一二考臺員或

十餘載竟不得遷除監司守令多貶秩停俸臣子精神才具無餘地展布曷由急功赴名之心不勝其掩罪匿瑕臣所慮於小臣者此也國家聞鞀鼓思將帥苟得其人推轂築壇禮亦宜之若必依序循資冒濫之竇雖可清獎拔之術或未盡臣所慮於武臣者此也撫按則使中官監視會同隙開水火其患顯潛通交結其患深臣所慮於內臣者此也忤旨譴責尋上合籌天下全局疏以策闕寧制登海為二大要分析中州秦晉之流賊江

右楚粵之山賊浙閩東粵之海賊滇黔楚蜀之土賊為
四大勢極控制駕馭之宜而歸其要於戢行伍以節餉
實衛所以銷兵復陳民間十四大苦曰里甲曰虛糧曰
行戶曰搜贓曰欵提曰隔提曰許訟曰窩訪曰私稅曰
私鑄曰解運曰馬戶曰鹽丁曰難民帝善其言下之所
司出按蘇松諸府廉積猾四人杖殺之宜興民發首輔
周延儒祖墓又焚翰林陳于昂于泰廬亦發其祖墓彪
佳捕治如法而於延儒無所徇延儒憾之回道考覈降

俸尋以侍養歸家居九年母服終召掌河南道事十六年佐大計問遺莫敢及門劄卷南畿乞休不允便道還家北都變聞謁福王於南京王監國或請登極彪佳請發喪服滿議其儀從之高傑兵擾揚州民奔避江南奸民乘機剽致命彪佳往宣諭斬倡亂者數人一方遂安遷大理寺丞旋擢右僉都御史巡撫江南蘇州諸生檄討其鄉官從賊者奸民和之少詹事項煜及大理寺正錢位坤通政司參議宋學顯禮部員外郎湯有慶之家

皆被焚劫常熟又焚給事中時敏家燬其三代四棺彪
佳請議從逆諸臣罪而治焚掠之徒以加等從之詔設
殿衛執事官彪佳上言洪武初官民有犯或收繫錦衣
衛高皇帝見非法凌虐焚其刑具送囚刑部是祖制原
無詔獄也後乃以羅織為事雖曰朝廷爪牙實為權奸
鷹狗舉朝盡知其枉而法司無敢雪慘酷等來周平反
無徐杜此詔獄之弊也洪武十五年改儀鑾司為錦衣
衛尚掌直駕侍衛等事未嘗令緝事也永樂間設立東

厥始開告密門兇人投為廝役赤手鉅萬飛誣及於善
良招承出於私拷怨憤滿乎京畿欲絕苞苴而苞苴彌
盛欲清奸宄而奸宄益多此緝事之弊也古者刑不上
大夫逆瑾用事始去衣受杖本無可殺之罪乃蒙必死
之刑朝廷受懷諫之名天下反歸忠直之譽此廷杖之
弊也疏奏乃命五城御史體訪而緝事官不設督輔部
將劉聲基陳可立張應夢于永綬駐京口浙江入衛都
司黃之奎亦部水陸兵三四千戍其地之奎御軍嚴四

將兵恣橫刃傷民浙兵縛而投之江遂有隙已而守備
李大開統浙兵斫鎮兵馬鎮兵與相擊射殺大開亂兵
大焚掠死者四百人彪佳至永綬等遁去彪佳劾治四
將罪綢卹被難家民大悅高磔駐瓜洲跋扈甚彪佳尅
期往會至期風大作傑意彪家必無來彪佳攜數卒衝
風渡傑大駭異盡撤兵衛會彪佳於大觀樓彪佳披肝
膈勉以忠義共獎王室傑感嘆曰傑閱人多矣如公傑
甘為死公一日在吳傑一日遵公約矣共飯而別羣小

疾彪佳競詆諆以沮登極立潞王為言彪佳竟移疾去
明年五月南都失守六月杭州繼失彪佳即絕粒至閏
月四日給家人先寢端坐池中而死年四十有四唐王
贈少保兵部尚書諡忠敏

贊曰張慎言徐石麒等皆北都舊臣剛方練達所建白
悉有裨時政令其受事熙朝從容展布庶幾乎列卿之
良也而遭時不造内外交訐動輒齟齬雖老成何能設
施幹濟哉左懋第仗節全貞蹈死不悔於奉使之義亦

無愧焉

明史卷二百七十五

欽定四庫全書

明史卷二百七十五考證

張慎言傳五年三月慎言假歸

臣嚴福按通鑑紀事

五年二月曹銓程誣劾慎言等受熊廷弼賄削藉歸
與傳中所言假歸異謹識

祁彪佳四朝遺老或蒙重譴

臣嚴福按四朝遺老謂陳

于廷也見孫承澤山書所載彪佳原疏謹附考

欽定四庫全書

卷二百七十五

附明史卷二百七十五考証後

乾隆四十一年

賜諡諸臣

徐石麒 專諡忠懿

祁彪佳 專諡忠專

左懋第 專諡忠貞

高倬 陳用極

以上通諡忠節

黃端伯 專諡烈愍

劉成治

吳嘉允

龔廷祥

陳于階

王一斌

張良佐

劉統

王廷佐

以上通諡節愍



總校官編修臣吳紹深

欽定四庫全書薈要

史部
明史卷二百七十六



詳校官兵部主事臣雷純

欽定四庫全書薈要卷六千八百六十九

史部

明史卷二百七十六

大學士張廷玉等奉 敕修

傳第一百六十四

朱大典 王道焜等

張國英

張肯堂

李向中 吳鍾巒 朱永祐等

曾 櫻

朱繼祚

湯 芬等

余

煌 陳函輝

王瑞柟

路振飛



何楷 林蘭友

熊汝霖

錢肅樂

劉中藻
鄭遵謙

沈宸荃

邑子履祥

朱大典字延之金華人世家貧賤大典始讀書為人豪邁登萬曆四十四年進士除章邱知縣天啓二年擢兵科給事中中官王體乾魏忠賢等十二人及乳媪客氏假保護功蔭錦衣世襲大典抗疏立諫五年出為福建副使進右叅政以憂歸崇禎三年起故官蒞山東尋調天津五年四月李九成孔有德圍萊州山東巡撫徐從

治中礮死擢大典右僉都御史代之詔駐青州調度兵食七月登萊巡撫謝璉復陷於賊總督劉宇烈被逮乃罷總督及登萊巡撫不設專任大典督主客兵數萬及關外勁旅四千八百餘人合勦之以總兵金國奇將率副將靳國臣劉邦域叅將祖大弼祖寬張韜遊擊栢永福及故總兵吳襄襄子三桂等以中官高起潛監護軍餉抵德州賊復犯平度副將牟文綬何維忠等救之殺賊魁陳有時維忠亦被殺八月巡按監軍御史謝三賓

至昌邑請斬王洪劉國柱詔逮治之兵部尚書熊明遇亦坐主撫誤國罷去三賓復抗疏請絕口勿言撫事國奇等至昌邑分三路國奇等關外兵為前鋒鄧玘步兵繼之從中路反瑋進昌平總兵陳洪範副將劉澤清方登化從南路平度進叅將王之富王文緯等從北路海廟進檄遊擊徐元亨等率萊陽師來會以牟文綬守新河諸軍皆攜三日糧盡抵新河東岸亂流以濟祖寬至沙河有德迎戰寬先進國臣繼之賊大敗諸軍乘勝追

至城下賊夜半東遁圍始解守者疑賊誘礮拒之起潛遣中使入諭闔城相慶明日南路兵始至國奇等遂擊賊黃縣斬首萬三千俘八百逃散及墜海死者數萬賊竄歸登州國臣等築長圍守之城三面距山一面距海牆三十里而遙東西俱抵海分番戍賊不能出發大礮官軍多死傷李九成出戰相當十一月九成搏戰降者洩其謀官軍合擊之馘於陣賊乃曉夜哭賊渠魁五九成有德有時耿仲明毛承祿也及是殺其二帝嘉解圍

功進大典右副都御史將吏陞賞有差是月國竒卒以
襄代攻圍既久賊糧絕恃水城可走不降及王之富祖
寬奪其水門外護牆賊大懼六年二月中旬有德先遁
載子女財帛出海仲明以水城委副將王秉忠已亦以
單舸遁官軍遂入大城攻水城未下遊擊劉良佐獻轟
城策匿人永福寺中穴城置火藥發之城崩官軍入賊
退保蓬萊閣大典招降始釋甲俘十餘人獲秉忠及偽
將七十五人自縊及投海死者不可勝計賊盡平有德

等走旅順島帥黃龍邀擊生禽其黨毛承祿陳光福蘇
有功斬李應元惟有德仲明逸去乃獻承祿等於朝磔
之先一日有功脫械走帝震怒斬監守官刑部郎多獲
罪未幾被執伏誅叙功進大典兵部右侍郎世蔭錦衣
百戶巡撫如故八年二月流賊陷鳳陽毀皇陵總督揚
一鵬被逮詔大典總督漕運兼巡撫盧鳳淮陽四郡移
鎮鳳陽時江北州縣多陷明年正月賊圍滁州連營百
餘里總兵祖寬大破之大典會總理盧象昇追襲復破

之急還兵遏賊衆於鳳陽賊始退十一年賊復入江北
謀竄茶山大典與安慶巡撫史可法提兵遏之賊乃西
遁大典先坐失州縣敗秩視事是年四月以平賊踰期
再敗三秩尋叙援勅及轉漕功盡復其秩十三年河南
賊大入湖廣大典遣將救援屢有功進左侍郎明年六
月命大典總督江北及河南湖廣軍務仍鎮鳳陽專辦
流賊而以可法代督漕運賊帥袁時中賊數萬橫潁亳
間大典率總兵劉良佐等擊破之叙賚有差大典有保

障功然不能持廉屢為給事中方士亮御史鄭崑貞等
所劾詔削籍候勘事未竟而東陽許都事發許都者諸
生負氣憤縣令苛斂作亂圍金華大典子萬化募健兒
禦之賊平而所募者不散大典聞急馳歸知縣徐調元
閱都兵籍有萬化名遂言大典縱子交賊巡按御史左
光先聞於朝得旨逮治籍其家充餉且令督賦給事中
韓如愈趣之已而京師陷福王立有白其誣者而大典
亦自結於馬士英阮大鍼乃召為兵部左侍郎踰月進

尚書總督上江軍務左良玉興兵命監黃得功軍禦之
福王奔太平大典與大鉞入見舟中誓力戰得功死王
被禽兩人遂走杭州會潞王亦降大典乃還鄉郡據城
固守唐王聞就加東閣大學士督師浙東踰年城破闔
門死之其時浙東西郡縣前後失守死事者杭州則有
同知王道焜錢塘知縣顧咸建臨安知縣唐自綵紹興
則有兵部主事高岱葉汝菡衢州則有巡按王景亮知
府伍經正推官鄧巖忠江山知縣方召若夫諸生及布

衣殉義者會稽潘集周卜年山陰朱瑋諸暨傅曰炯鄞
縣趙景麟浦江張君正瑞安鄒欽堯永嘉鄒之琦其尤
著云王道焜字昭平錢塘人以天啓元年舉於鄉崇禎
時為南平知縣遷南雄同知會光澤寇發其父老言非
道焜不能平撫按為請詔改邵武同知知光澤縣事撫
勅兼施境內底定莊烈帝破格求賢盡徵天下賢能吏
撫按以道焜名聞方待命而都城陷微服南還及杭州
失守遂投繯死顧咸建字漢石崑山人大學士鼎臣曾

孫也崇禎十六年進士授錢塘知縣甫之官聞京師陷人情洶洶咸建戢奸宄嚴警備巡按御史彭遇颯以貪殘激變賴咸建調護事寧而民免株連及南都失守鎮江守將鄭彩等率衆還閩緣道劫掠咸建出私財迎犒乃斂威去亡何馬士英擁兵至頃之大將方國安兵亦至咸建謀於上官先期遣使行賂兵乃不入城四鄉多被淫掠城中得無擾時監司及郡縣長吏悉遁竄咸建敬遣妻子獨守官不去潞王既降咸建不至尋被執死

之唐自綵達州人為臨安知縣杭州失守自綵與從子
階豫逃山中有言其受魯王敕陰部署為變遂被捕獲
自縊麾階豫走不從竟同死高岱字魯瞻會稽人崇禎
中以武學生舉順天鄉試魯王授為職方主事及紹興
失守即絕粒祈死子朗知父意不可回先躍入海中死
岱聞之曰兒果能先我乎自是不復言數日亦卒葉汝
菴字衡生岱同邑人由舉人為兵部主事聞變與妻王
氏出居桐塢墓所並赴水死王景亮字武侯吳江人崇

禎末登進士仕福王為中書舍人唐王立擢御史巡撫
金衢二府兼視學政伍經正安福人由貢生為西安知
縣唐王超擢知府事鄧巖忠江陵人由鄉舉為推官衢
州破經正赴井死景亮巖忠皆自縊死魯王所遣鎮將
張鵬翼亦死之方召宣城人署江山縣事金華被屠集
父老告之曰兵且至吾義不當去然不可以一人故致
闔城被殃遂封其印冠帶向北拜赴井死士民為收葬
立祠祀焉

張國維字玉筍東陽人天啓二年進士授番禺知縣崇

禎元年擢刑科給事中劾罷副都御史楊所修御史田
景新皆魏忠賢黨也已陳時政五事言陛下求治太銳
綜核太嚴拙者跼蹐以避咎巧者委蛇以取容誰能展
布四體為國家營職業者故治象精明而腹心手足之
誼實薄此英察宜斂也祖宗朝閣臣有封還詔旨者有
疏揭屢上而爭一事者今一奉詰責則俛首不遑一承
改擬則順旨恐後倘處置失宜亦必不敢執奏此將順

宜戒也召對本以通下情未有因而獲罪者今則惟傳
天語莫覩拜颺臣同官熊奮渭還朝十日旁措一詞遂
蒙譴謫不可稍加薄罰示優容之度乎此上下宜洽也
其二條請平刑罰溥膏澤帝不能盡用進禮科都給事
中京師地震規弊政甚切遷太常少卿七年擢右僉都
御史巡撫應天安慶等十府其冬流賊犯桐城官軍覆
沒國維方壯年一夕鬚髮頃白明年正月率副將許自
強赴援遊擊潘可大知縣陳爾銘等守桐不下賊乃攻

潛山知縣趙士彥重傷卒攻太湖知縣金應元訓導扈
永寧被殺國維至解桐圍遣守備朱士允趨潛山把總
張其威趨太湖士允戰死自強遇賊宿松殺傷相當安
慶山名桀石以投賊賊多死乃越英山霍山而遁九月
賊復由宿松入潛山太湖他賊掃地王亦陷宿松等三
縣國維乃募土著二千人戍之而以兵事屬監軍史可
法明年正月賊圍江浦遣守備蔣若來陳于王戰却之
十二月賊分兵犯懷寧可法及左良玉馬壙過之復犯

荻港漕艘鹽船盡奪以載兵聲言諸將寄帑南京請以親信三千人與俱南京諸文武官及操江都御史至陳師江上為守禦士民一夕數徙商旅不行都御史李邦華被召道湖口草檄告良玉以危詞動之而令安慶巡撫發九江庫銀十五萬兩補六月糧軍心乃定邦華入見帝論良玉潰兵之罪請歸罪於王允成帝乃令良玉誅允成而獎其能定變良玉卒留允成於軍中不誅也良玉留安慶久之徐湖九江上聞獻忠破湖廣沉楚王

於江坐視不救八月乃入武昌立軍府招徠下流粗定
會賊自長沙陷袁州命副將吳學禮赴援江西巡撫郭
都賢惡其淫掠檄歸之自募土兵戍守未幾賊突陷吉
安復陷袁州岳州良玉遣馬進忠援袁州馬士秀援岳
州士秀率水師敗賊岳州二城竝復時帝命兵部侍郎
呂大器代侯恂為總督恂解任中道逮下獄良玉知為
已故心鞅鞅與大器齟齬賊連陷建昌諸府大器無兵
不能救良玉亦不援進忠與賊戰嘉魚再失利良玉軍

之獻浮於朝磔諸市兵部尚書陳新甲下獄帝召國維代之乃定戰守賞罰格列上嚴世職酌推陞慎咨題等七事帝皆報可會開封陷河北震動條防河數策帝亦納之十六年四月我

大清兵入畿輔國維檄趙光抃拒螺山八總兵之師皆潰言者詆國維乃解職尋下獄帝念其治河功得釋召對中左門復故官兼右僉都御史馳赴江南浙江督練兵輸餉諸務出都十日而都城陷福王召令協理戎政

尋叙山東討賊功加太子太保廕錦衣僉事吏部尚書
徐石麟去位衆議歸國維馬士英不用用張捷國維乃
乞省親歸南都覆踰月潞王監國於杭州不數日出降
閏六月國維朝魯王於台州請王監國即日移駐紹興
進國維少傅兼太子太傅兵部尚書武英殿大學士督
師江上總兵官方國安亦自金華至馬士英素善國安
匿其軍中請入朝國維劾其十大罪乃不敢入連復富
陽於潛樹木城緣江要害聯合國安及王之仁鄭遵謙

熊汝霖孫嘉績錢肅樂諸營為持久計

順治三年五月國安等諸軍乏餉潰王走台州航海國
維亦還守東陽六月知勢不可支作絕命祠三章赴水
死年五十有二

張宥堂字載寧松江華亭人天啓五年進士授濬縣知
縣崇禎七年擢御史明年春賊陷鳳陽條上滅賊五事
俄以皇陵震驚疏責輔臣不宜作秦越之視帝不問出
按福建數以平寇功受賚還朝言監司營競紛紜意所

欲就則保留久任意所欲避則易地借才今歲燕秦明
歲閩粵道路往返動經數千程限稽遲多踰數月加一
番更移輒加一番擾害帝是其言十二年十月楊嗣昌
出督師宵堂奏言從古勘亂之法初起則解散勢成則
剪除未有專任撫者今輔臣膺新命而出賊必仍由故
技佯搖尾乞憐而失事諸臣冀掩從前敗局必多方熒
惑仍進撫議請特申一令專務勦除有進招撫說者立
置重典帝以偏執臆見責之十四年四月言流寇隳城

破邑往來縱橫如入無人之境此督師嗣昌受事前所未有目前大計在先釋嗣昌之權疏入而嗣昌已死十二月復言今討賊不可謂無人巡撫之外更有撫治總督之上又有督師位號雖殊事權無別今楚自報捷豫自報敗甚至南陽失守禍中親藩督師職掌安在試問今為督師者將居中而運以發蹤指示為功乎抑分賊而辨以焦頭爛額為事乎今為秦保二督者將兼顧提封相為犄角之勢乎抑遇賊追勦專提出境之師乎今

為撫者將一稟督師之令進退惟其指揮乎抑兼視賊勢之急戰守可以擇利乎凡此宵縻一切置不問中樞冥冥而決諸臣瞶瞶而任至失地喪師中樞糾督撫以自解督撫又互相委以射愆而疆事不可問矣帝納其言下所司詳議十五年請召還建言謹誦諸臣乃復給事中陰潤李清劉昌御史周一敬官宥堂遷大理丞旋擢右僉都御史巡撫福建總兵鄭鴻達擁唐王聿鍵入閩與其兄南安伯芝龍及宥堂勸進遂加太子少保吏

部尚書曾櫻至言官請令櫻掌吏部乃令宥堂掌都察院宥堂請出募舟師由海道抵江南倡義旅而王由仙霞趨浙東與相聲援乃加少保給敕印便宜從事芝龍懷異心陰沮之不成行

順治三年王敗死宥堂飄泊海外六年至舟山魯王用為東閣大學士八年

大清兵乘天霧集螺頭門定西侯張名振奉王航海去屬宥堂城守城中兵六千居民萬餘堅守十餘日城破

肯堂衣蟒玉南向坐令四妾一子婦一女孫先死乃從
容賦詩自經時同死者兵部尚書李向中禮部尚書吳
鍾巒吏部尚書朱永佑安洋將軍劉世勛左都督張名
揚又有通政使會稽鄭遵儉兵科給事中鄞縣董志寧
兵部郎中江陰朱養時戶部主事福建林瑛蘇州江用
揖禮部主事會稽董元兵部主事福建朱萬年長洲顧
珍臨山衛李開國工部主事長洲顧中堯中書舍人蘇
州蘇兆人工部所正鄞縣戴仲明定西侯叅謀順天顧

民楫諸生福建林世英錦衣指揮王朝相內官監太監

劉朝凡二十一人李向中鍾祥人崇禎十三年進士授

長興知縣調秀水福王時歷車駕郎中蘇松兵備副使

唐王以為尚寶卿閩事敗避海濱魯王監國召為右僉

都御史從航海進兵部尚書從至舟山及是破大帥召

向中不赴發兵捕之以衰經見大帥呵之曰聘汝不至

捕即至何也向中從容曰前則辭官今就戮耳吳鍾鑿

字巒雅武進人崇禎七年進士授長興知縣以旱潦徵

練餉不中額謫紹興照磨踰年移桂林推官聞京師變
流涕曰馬君常必能死節已而世奇果死福王立遷禮
部主事抵南雄聞南都失轉赴福建痛陳國計魯王起
兵以鍾巒為禮部主事往來普陀山中

大清兵至寧波鍾巒慷慨謂人曰昔仲達死墻禍吾以
諸生不得死君常死賊難吾以遠臣不得從死今其時
矣乃急渡海入昌國衛之孔廟積薪左廡下抱孔子木
主自焚死仲達者江陰李應昇鍾巒弟子忤魏忠賢死

黨禍者也朱永佑字爰啓崇禎七年進士授刑部主事
改吏部罷歸事唐王後至舟山城破被執願為僧不許
乃就戮名揚名振弟城破母范以下自焚者數十人朝
相聞城失守獲王妃陳氏貴嬪張氏義陽王妃杜氏入
井用巨石覆之自刎其旁開國母瑛明楫妻皆自盡

曾櫻字仲含峽江人萬曆四十四年進士授工部主事
歷郎中天啓二年稍遷常州知府諸御史巡鹽倉江漕
及提學屯田者皆搃舉劾權文傑曰至櫻牒南京都察

院曰他方守令奔命一巡按獨南幾奔命數巡按請一
切戒飭罷鈎訪取贖諸陋習都御史熊明遇為申約束
馮櫻持身廉為政愷悌公平不畏強禦屯田御史索屬
吏應劾者姓名櫻不應御史危言恐之答曰僚屬已盡
無可糾止知府無狀因自署下考杜門待罪撫按亟慰
留乃起視事織造中官李實迫知府行屬禮櫻不從實
移檄以爾汝侮之櫻亦報以爾汝卒不屈無錫高攀龍
江陰繆昌期李應昇被逮櫻助昌期應昇貨而經紀攀

龍死後事為文祭之出其子及僮僕於獄宜興毛士龍
坐忤魏忠賢遣戍櫻諷士龍逃去上官捕其家人賴櫻
以免武進孫慎行忤忠賢當戍櫻緩其行忠賢敗事遂
解崇禎元年以右叅政分手漳南九蓮山賊犯上杭櫻
募壯士擊退之夜搗其巢殲賊殆盡士民為櫻建祠毋
憂歸服闋起故官分手興泉二郡進按察使分巡福寧
先是紅夷寇興泉櫻請巡撫鄒維璉用副總兵鄭芝龍
為軍鋒果奏捷及劉香寇廣東總督熊文燦欲得芝龍

為援維璉等以香與芝龍有舊疑不遣櫻以百口保芝
龍遂討滅香芝龍感櫻甚十年冬帝信東廠言以櫻行
賄謀擢官命械赴京御史葉初春嘗為櫻屬吏知其廉
於他疏微白之有詔詰問因具言櫻賢然不知賄所從
至詔至聞巡撫沈猶龍巡撫張肖堂閱廠檄有奸人黃
四臣名芝龍前白曰四臣我所遣我感櫻恩恐遷去令
從都下訊之四臣乃妄言致有此事猶龍肖堂以入告
力白櫻寬芝龍亦具疏請罪士民以櫻貧為釀金辦裝

者老數千人隨至闕下擊登聞鼓訟寃帝命毋入獄俟
命京邸削芝龍都督銜而令櫻以故官巡視海道尋以
衡永多寇改櫻湖廣按察使分守湖南給以敕故事守
道無救帝特賜之時賊已殘十餘州縣而永州知府推
官咸不任職櫻薦蘇州同知晏日曙歸德推官萬元吉
才兩人方坐事罷官以櫻言並起用櫻乃調芝龍勦賊
賊多降一方遂安遷山東右布政使分守東萊十四年
春擢右副都御史代徐人龍巡撫其地明年遷南京工

部右侍郎乞假歸山東初被兵巡撫王永吉所部濟兗東三府州縣盡失匿不以聞兵退以恢復報而櫻所部青登萊三府失州縣無幾盡以實奏及論罪永吉反擢總督而櫻奪官逮下刑部獄不十日而京師陷賊釋諸囚櫻乃遁還其後唐王稱號於福州芝龍薦櫻起工部尚書兼東閣大學士無何令掌吏部尋進太子太保吏部尚書文淵閣王駐延平令櫻留守福州

大清兵破福州櫻接家避海外中左衛越五年其地被

兵遂自縊死

朱繼祚莆田人萬曆四十七年進士改庶吉士授編修
天啓中與修三朝要典尋罷去崇禎初復官累遷禮部
右侍郎充實錄總裁給事中葛樞言繼祚嘗纂修要典
得罪清議不可總裁國史不聽繼祚旋謝病去起南京
禮部尚書又以人言罷去福王時起故官未赴南都失
唐王召為東閣大學士從至汀州王就禽繼祚奔還其
鄒魯王監國繼祚舉兵應王攻取興化城既而

大清兵至城復破繼祚及叅政湯芬給事中林崱知縣
都廷諫並死之芬字方侯嘉善人崇禎十六年進士福
王時為史可法監紀推官唐王以為御史尋以監司分
守興泉道城破緋衣坐堂上見殺崱字小眉繼祚同邑
人由進士為吳江知縣蘇州失歸仕唐王至是自縊死
廷諫杭州人莆田知縣王自監國二年正月至長垣迨
次年正月連克建寧邵武興化三府福寧一州漳浦海
澄連江長樂等二十七縣軍聲頗振及是得者復失海

澄失知縣洪有文死之永福失邑人給事中鄔正畿御
史林逢經俱投水死長樂失邑人御史王恩及服毒死
妻李氏同死建寧失守將王祈巷戰不勝自焚死

余煌字武貞會稽人天啓五年進士第一授翰林修撰
與修三朝要典崇禎時以內艱歸服闋起左中允歷左
諭德右庶子充經筵講官給事中韓源劾禮部侍郎吳
士元御史華琪芳及煌皆與修要典宜斥帝置不問煌
疏辯帝復溫旨慰諭之戶部尚書程國祥請借京城房

祖煌爭不可乞假歸遂丁外艱服除久不起魯王監國
紹興起禮部右侍郎再起戶部尚書皆不就明年以武
將橫甚拜煌兵部尚書始受命時諸臣競營高爵請乞
無厭皇上言今國勢愈危朝政愈紛尺土未復戰守無
資諸臣請祭則當思先帝蒸嘗未備請葬則當思先帝
山陵未營請封則當思先帝宗廟未享請蔭則當思先
帝子孫未保請謚則當思先帝光烈未昭時以為名言
大清兵過江王航海遁六月二日煌赴水舟人拯起之

居二日復投深處乃死陳函輝字木叔臨海人崇禎七年進士授靖江知縣為御史左光先劾罷北都陷誓衆倡義會福王立不許草澤勤王乃已尋起職方主事監軍江北事敗歸魯王擢為禮部右侍郎從王航海已而相失哭入雲峯山作絕命詞十章投水死

王瑞柟字聖木永嘉人天啓五年進士授蘇州推官兼理兌運軍民交兌恒相軋啓釁瑞柟調劑得宜歲省浮費三萬金上官為勒石著令貴人弟奸法執問如律具

人中之當道將議調遂歸崇禎七年起河間推官遷工部主事調兵部轉職方員外郎擢湖廣兵備僉事駐襄陽十一年春張獻忠據穀城乞撫總理熊文燦許之瑞柎以為非計謀於巡按林銘球總兵官左良玉將俟其至執之文燦固執以為不可瑞柎言賊以計愚我我不可為所愚今良玉及諸將賈一選周士鳳之兵俱在近境誠合而擊之何患不捷文燦怒責以撓撫局瑞柎曰賊未創而據撫彼將無所懼惟示以必勦之勢乃心折

不敢貳非相撓實相成也文燦不從瑞柎乃列上從征
歸農解散三策文燦亦不用瑞柎自為檄諭獻忠獻忠
恃文燦庇己不聽明年獻忠叛瑞柎先己丁憂歸獻忠
留書於壁言己之叛總理使然具列上官姓名及取賄
月日而題其末曰不納我金者王兵備一人耳由是瑞
柎名大著服闋未及用而都城陷福王時召為太僕少
卿極陳有司虐民之狀旋告歸唐王召赴福建仍故官
未幾復歸及閩地盡失溫州亦不守避之山中有欲薦

令出者乃拜辭家廟從容入室自經死

路振飛字見白曲周人天啓五年進士除涇陽知縣大吏諂魏忠賢將建祠涇陽振飛執不從邑人張問達忤奄坐追贓十萬振飛故遷延奄敗事解流賊入境擊却之崇禎四年徵授御史疏劾周延儒卑汚奸險黨邪醜正祈立斥以清揆路被旨切責未幾陳時事十大弊曰務苛細而忘政體喪廉恥而壞官方民愈窮而賦愈堅有事急而無事緩知顯患而忘隱憂求治事而鮮治人

責外重而責內輕嚴於小而寬於大臣日偷而主日疑
有詔旨而無奉行疏入詔付所司山東兵叛劾巡撫余
大成孫元化且論延儒曲庇罪帝不問已劾吏部尚書
閔洪學結權勢樹私人秉銓以來吏治日壞洪學自引
去廷推南京吏部尚書謝陞為左都御史振飛歷詆其
醜狀陞遂不果用六年巡按福建海賊劉香數勾紅夷
入犯振飛懸千金屬將士遣遊擊鄭芝龍等大破之詔
賜銀獎俸滿以京卿錄用初振飛論海賊情形謂巡撫

鄒維璉不能辨語侵之維璉罷去命甫下數奏捷振飛
乃力暴其功維璉復召用八年夏帝將簡輔臣振飛言
枚卜盛典使夤緣者竊附則不光如向者周延儒溫體
仁等公論俱棄宅揆以後民窮盜興辱己者必不能正
天下時延儒已斥而體仁方居首揆銜之已而振飛按
蘇松請除輸布收銀白糧收兌之四大患民困以蘇會
常熟錢謙益瞿式耜為奸民張漢儒所訐體仁坐振飛
失糾擬旨令陳狀振飛白謙益無罪語刺體仁體仁恚

激帝怒謫河南按察司檢校入為上林丞屢遷光祿少卿十六年秋擢右僉都御史總督漕運巡撫淮揚明年正月流賊陷山西振飛遣將金聲桓等十七人分道防河由徐泗宿遷至安東沐湯且團練鄉兵犒以牛酒得兩淮間勁卒數萬福周潞崇四王避賊同日抵淮大將劉澤清高傑等亦棄汎地南下振飛悉延接之四月初聞北都陷福王立為南京河南副使呂弼周為賊節度使來代振飛進士武愷為賊防禦使招撫徐沛而賊將

董學禮據宿遷振飛擊禽弼周悖走學禮竿弼周法場
命軍士人射三矢乃解磔之縛恣徇諸市鞭八十檻車
獻諸朝伏誅五月馬士英欲用所親田仰乃罷振飛振
飛亦遭母喪家無可歸流寓蘇州尋錄功即家加右副
都御史振飛初督漕謁鳳陽皇陵望氣者言高牆有天
子氣唐王聿鏗方以罪錮守陵中官虐之振飛上疏乞
緊寬罪宗竟得請

順治二年大兵破南京聿鏗自立於福州拜為左都御

史募能致振飛者官五品賜二千金振飛乃赴召道拜太子太保吏部尚書兼文淵閣大學士至則大喜與宴抵夜分撤燭送歸解王帶賜之官一子職方員外郎又錄守淮功廕錦衣世千戶王每責廷臣怠玩振飛因進曰上謂臣僚不改因循必至敗亡臣謂上不改掇切亦未必能中興也上有愛民之心而未有愛民之政有聽言之明而未及聽言之效喜怒輕發號令屢更見羣臣庸下而過於督責因博覽書史而務求明備凡上所長

皆臣所甚憂也其言曲中王短云三年

大清兵進仙霞關聿鍵走汀州振飛追赴不能及汀州
破走居海島明年赴永明王召卒於途

何楷字元子漳州鎮海衛人天啓五年進士值魏忠賢
亂政不謁選而歸崇禎時授戶部主事進員外郎改刑
科給事中流賊陷鳳陽燬皇陵楷劾巡撫楊一鵬巡按
吳振纓罪而刺輔臣溫體仁王應熊言振纓體仁私人
一鵬應熊座主也逆賊犯皇陵神人共憤陛下輟講避

殿感動臣民二輔臣獨漫視之欲令一鵬振纓戴罪自贖情面重祖宗陵寢為輕朋比深天下譏刺不恤忤旨鐫一秩視事又言應熊體仁奏辨明自引門生姻婭刑官瞻徇實由於此乞宣諭輔臣毋分別恩仇以國事為戲應熊復奏辯楷言臣疏未奉旨應熊先一日據引臣疏詞必有漏禁中語者帝意動令應熊自陳應熊竟由是去吏部尚書謝陞言登萊要地巡撫陳應元引疾宜允其去及推勞永嘉代應元則言登萊巡撫本贅員楷

亦疏駁之楷又請給贈都御史高攀龍官誥賜左光斗
諸臣謚召還惠世揚疏多見聽屢遷工科都給事中十
一年五月帝以火星逆行減膳修省兵部尚書楊嗣昌
方主款議厯引前史以進楷與南京御史林蘭友先後
言其非楷言嗣昌引建武款塞事欲借以申市賞之說
引元和田興事欲借以申招撫之說引太平興國連年
兵敗事欲借以申不可用兵之說徒巧附會耳至永平
二年馬皇后事更不知指斥安在帝方護嗣昌不聽踰

月嗣昌奪情入閣楷又劾之忤旨貶二秩為南京國子
監丞母憂歸服闋廷臣交薦召入京都城已陷福王擢
楷戶部右侍郎督理錢法命兼工部右侍郎連疏請告
不許

順治二年南都破楷走杭州從唐王入閩擢戶部尚書
鄭芝龍鴻達兄弟橫甚郊天時稱疾不出楷言芝龍無
人臣禮王獎其風節命掌都察院事鴻達扇殿上楷呵
止之兩人益怒楷知不為所容連請告去途遇賊截其

一耳乃芝龍所使部將楊耿也漳州破楷遂抑鬱而卒
楷博綜羣書寒暑勿輟尤邃於經學林蘭友字翰荃仙
遊人崇禎四年進士授臨桂知縣擢南京御史疏劾大
學士張至發薛國觀吏部尚書田惟嘉等因論嗣昌忠
孝兩虧貶浙江按察司照磨與楷及黃道周劉同升趙
士春稱長安五諫遷光祿署丞京師陷薙髮自匿為賊
所執拷掠備至賊敗南還唐王用為太僕少卿遷僉都
御史事敗挈家遁海隅十餘年卒

熊汝霖字雨殷餘姚人崇禎四年進士授同安知縣擢戶科給事中疏陳用將之失言自偏褊至副將厯任有功方可授節鉞今足未履行陣募府以上首功胥吏提虎旅紂袴子握兵符何由奮敵愾若大將之選宜召副將有功者時賜面對擇才者用之廷臣推擇有誤宜用文吏保舉連坐法帝納其言已言楊嗣昌未罪盧象昇未褒殊挫忠義氣至為嗣昌畫策練餉驅中原萬姓為盜者原任給事中沈迅也為嗣昌運籌以三千人駐襄

陽城破輒走者監紀主事俞爵也為嗣昌援引遭襄藩
之陷重賂陳新甲嫁禍耶撫袁繼咸者今解任侯代之
宋一鶴也皆悞國之臣宜罪不報京師戒嚴汝霖分守
東直門嘗召對言將不任戰敵南北往返謹隨其後如
厮隸之於貴官員督前驅望塵靡及何名為將何名為
督師帝深然之已言有司察處者不得濫舉邊才監司
察處者不得遽躡巡撫庶強疆重任不為匪人借途又
言自戒嚴以來臣疏凡二十上援勅機宜百不行一而

所揣敵情不幸言中矣比者外縣難民紛紛入都皆云避兵不云避敵霸州之破敵猶不多殺掠官軍繼至始無孑遺朝廷歲費數百萬金錢以養兵豈欲毒我赤子帝惡其中有飲泣地下語謫為福建按察司照磨福王立召還上疏言臣自丹陽來知浙兵為邊兵所擊火民居十餘里邊帥有言四鎮以殺掠獲封爵我何憚不為臣意四鎮必毅然北征一雪此恥今戀戀淮揚何也况一鎮之餉多至六十萬勢必不能供即倣古藩鎮法亦

當在大河以北開屯設府會輿突之內而遽以藩籬視
之頃之言臣竊觀目前大勢無論恢復未能即偏安尚
未可必宜日討究兵餉戰守乃專在恩怨異同勲臣方
鎮古鋒筆鏑是逞近且以匿名帖逐舊臣以疏遠宗人
劾宰輔中外紛紛謂將復厥衛夫厥衛樹威牟利小民
雞犬無寧日先帝止此一節未免府怨前事不遠後事
之師且先帝篤念宗藩而聞寇先逃誰死社稷先帝隆
重武臣而叛降跋扈肩背相踵先帝委任勲臣而京營

銳卒徒為寇籍先帝倚任內臣而開門延敵衆口誼傳
先帝不次擢用文臣而邊才督撫誰為捍禦超遷宰執
羅拜賊庭知前日之所以失即知今日之所以得及今
不為將待何時疏奏停俸尋補吏科右給事中初馬士
英薦阮大鍼汝霖爭不可及大鍼起佐兵部汝霖又言
大鍼以知兵用當置有用地不宜處中朝不聽踰月以
奉使陞辭言朝端議論日新官府揣摩日熟自少宰樞
貳悉廢廷推四品監司竟晉詹尹暎徑疊出謠詠繁興

一人未用便目滿朝為黨人一官外遷輒訾當事為可
殺置國恤於罔聞逞私圖而得志黃白充庭青紫塞路
六朝佳麗復見今時獨不思他日稅駕何地耶不報未
幾南京破士英竄杭州汝霖責其棄主士英無以應杭
州亦破與孫嘉績同起兵魯王監國擢右僉都御史督
師防江戰屢敗入海寧募兵萬人進兵部右侍郎唐王
立閩中遣劉中藻頒詔汝霖出檄嚴拒之

順治三年進兵部尚書從魯王泛海明年以本官兼東

閻大學士又明年春鄭彩憾汝霖潛遣兵害之并其幼子投海中

錢肅樂字希聲鄞縣人臨江知府若賡孫寧國知府敬忠兄子也崇禎十年成進士授太倉知州豪家奴與黠吏為奸而兇徒結黨殺人焚其屍肅樂痛懲皆斂手又以朱白榜列善惡人名械白榜者階下予大杖久之杖者日少嘗攝崑山崇明事兩縣民皆立碑頌德遷刑部員外郎尋丁內外艱

順治二年大兵取杭州屬郡多迎降閏六月寧波鄉官
議納款肅樂建議起兵諸生華夏董志寧等遮拜肅樂
倡首士民集者數萬人肅樂乃建牙行事郡中監司守
令皆逃惟一同知治府事肅樂索取倉庫籍繕完守具
與總兵王之仁締盟共守聞魯王在台州遣舉人張煌
言奉表請監國會紹興餘姚亦舉兵王乃赴紹興行監
國事召肅樂為右僉都御史畫錢塘而守尋進右副都
御史當是時之仁及大將方國安並加封爵其兵食用

左良玉傳尤世威守碓南

臣方煒按是時命世威與

徐來朝守碓南之蘭川朱陽關既而來朝不肯入
山兵譁於盧氏七月兵變來朝遁見綏寇紀略謹附
識

左良玉傳八月敗賊於馮城

臣方煒按馮陵之勝為

八月二十六日是日馬文良與李雲程敗之於鼓祖
店見明紀事本末謹附識

左良玉傳賊再攻密良玉自邗授之乃去

臣方煒按

賊先於九月六日自嵩華趨邾禹攻密縣知縣苗之
庭敗之城下至二十六日再攻之三晝夜之庭乘堙
殺賊三百餘人良玉至乃去見明紀事本末謹附識
左良玉傳總理熊文傑至安慶部檄以至良玉軍隸

臣方煒按是時文燦至安慶所隨黔兵千人無騎上
疏請戰馬三千匹嗣昌因命良玉隸之見明紀事本
末謹附識

左良玉傳是月許州兵變

臣方煒按許州之變先是

沈宸荃慈谿人崇禎十三年進士授行人奉使旋里福
王立復命擢御史疏陳五事皆切時病已論羣臣醜正
黨邪請王卧薪嘗膽為雪恥報讐之計尋薦詞臣黃道
周劉同升葛世俊徐汧吳偉業等又言經畧山東河南
者王永吉張縉彥也永吉失機先帝拔為總督擁兵近
甸不救國危縉彥官部曹先帝驟擢典中樞乃率先從
賊即加二人極刑不為過陛下屈法用之而永吉觀望
逗遛縉彥狼狽南竄死何以對先帝生何以對陛下昌

平巡撫何謙失陷諸陵罪亦當按都城既陷守土臣宜
皆厲兵秣馬以報國讐乃賊塵未揚輒先去以為民望
如河道總督黃希憲山東巡撫邱祖德尚可容偃卧家
園子疏入謙祖德等皆命逮治永吉縉彥不罪時朝政
大亂宸荃獨特正要多疾之明年以年例出為蘇松
兵備僉事未赴南都破宸荃舉兵邑中魯王監國擢右
僉都御史已而事敗宸荃棄家從王海外王次長垣連
擢至大學士從王於舟山又從泛海抵廈門金門後艤

舟南日山遭風沒於海其邑子沈履祥嘗為知縣監國時以御史督餉台州城破避山中被獲死之

贊曰自甲申以後明祚既終不踰年而南都亦覆勢固無可為矣朱大典張國維等抱區區之義徒假名號於海濱以支旦夕而上替下陵事無統紀欲以收偏安之效何可得乎

明史卷二百七十六

欽定四庫全書

明史卷二百七十六考證

張國維傳建蘇州九里石塘及平望內外塘長洲至和
等塘修松江捍海堤濬鎮江及江陰漕渠

臣嚴福

按三吳水利明初設有專官萬歷間日就廢弛農人竭
蹶培壅收穫仍儉國維徧探河渠悉為圖說并搜輯
臣僚章奏官司案牘為三吳水利全書三十卷上於
朝見通鑑紀事謹附考

何楷傳屢遷工科給事中

臣

嚴福按楷以獄訟繁興

列上定新例行久任酌分理重會審嚴斃獄革驛鋪
飭聲寃究造謗八議見通鑑紀略謹附考

附明史卷二百七十六考證後

乾隆四十一年

賜諡諸臣

張國維 專諡忠敏

張肯堂 專諡忠穆

吳鍾巒 專諡忠烈

顧咸建 唐自采 李向中 董志寧 曾 櫻

朱繼祚 余 煌 陳函輝 王瑞楫 熊汝霖

錢肅樂 沈宸荃

以上通謚忠節

朱大典 金應元 朱士允 朱永佑 劉世勛

張名揚 王朝相 湯芬 王祈 劉中藻

以上通謚烈愍

王道焜 高岱 葉汝菹 王景亮 伍經正

鄧巖忠 方召 張鵬異 朱養時 林瑛

江用楫 董元 朱萬年 顧珍 李開國

顧中堯 蘇兆人 戴仲明 鄭遵儉 林 崱

都廷諫 洪有文 馮正畿 林逢經 王恩及

鄭遵謙 沈履祥

以上通謚節愍

欽定四庫全書薈要卷六千八百七十 史部

明史卷二百七十七

大學士張廷玉等奉 敕修

列傳第一百六十五

袁繼成 張亮

金聲 江天一

邱祖德 溫璜

沈猶龍 吳應箕 李待問

尹民興等

章簡

陳子龍 夏允彝

侯峒曾 徐孚遠 閻應元等

朱集璜等

楊文驄 孫臨等

陳潛夫 陸培

沈廷揚

林汝翥

林

塗

鄭為虹

黃大鵬
胡上琛

王士和
熊緯

袁繼咸字季通宜春人天啟五年進士授行人崇禎三年冬擢御史監臨會試坐縱懷挾舉子謫南京行人司副遷主客員外郎七年春擢山西提學僉事未行總理戶工二部中官張彝憲有朝覲官齋冊之奏繼咸疏論之謂此令行上自藩臬下至守令莫不次第參謁屏息低眉跪拜於中官之座率天下為無恥事大不便彝憲

大恚與繼咸互訐奏帝不聽乃子身赴任久之巡撫吳
姓薦其廉能而巡按御史張孫振以請屬不應疏誣繼
咸賊私事帝怒逮繼咸責姓回奏姓賢繼咸斥孫振諸
生隨至都伏闕訴寃繼咸亦列上孫振請屬狀及其賊
賄數事詔逮孫振坐謫戍繼咸得復官十年除湖廣參
議分守武昌以兵搗江賊巢興國大冶山中禽賊首呂
瘦子降其黨千餘人詔兼僉事分巡武昌黃州擊退賊
老回回革裏眼等七大部黃陂黃安築黃岡城六千餘



總校官編修臣吳紹深

袁州俱陷仍推繼咸代之甫抵鎮而京師陷福王立南都頒詔武昌良王不拜詔繼咸致書言倫序正良王乃拜受詔繼咸入朝高傑新封興平伯繼咸曰封爵以勸有功無功而封有功者不勸跋扈而封跋扈愈多王曰事已行奈何繼咸曰馬士英引傑渡江宜令往輯王曰彼不欲往輔臣史可法願往繼咸曰陛下嗣位固以恩澤收人心尤宜以紀綱肅衆志乞振精神申法紀冬春間淮上未必無事臣雖駑願奉六龍為澶淵之舉王有

難色因詣榻前密奏曰左良玉雖無異圖然所部多降

將非孝子順孫陛下初登大寶人心危疑意外不可不
慮臣當星馳回鎮許之因赴閭責可法不當封傑士英
嘆之俄陳致治守邦大計引宋高宗用黃潛善汪伯彥
事語復侵士英會湖廣巡按御史黃澍劾奏士英十大
罪士英擬旨逮治澍與良玉謀陰諷將士大譁欲下南
京索餉保救澍繼咸為留江漕十萬石餉十三萬金給
之且代澍申理以良玉依仗澍為言士英不得已免逮

澍繼成既與士英隙所奏悉停寢明年正月繼成言元
朔者人臣拜手稱觴之日陛下嘗膽卧薪之時念大恥
未雪宜以周宣之未央問夜為可法以晚近長夜之飲
角觝之戲為可戒省土木之功節浮淫之費戒諭臣工
後私鬪而急公讐臣每歎三十年來徒以三案葛藤血
戰不已若要典一書已經先帝焚毀何必復理其說書
苟未進宜寢之即已進宜毀之至王者代興從古亦多
異同平勃迎立漢文不聞窮治朱虛之過房杜決策秦

邨不聞力究魏徵之非固其君豁達大度亦其大臣公

忠善謀翊贊其美請再下寬大之詔解園扉疑入之囚

斷草野株連之案王降旨俞其言羣小皆不喜繼咸汰

其軍餉六萬軍中有怨言繼咸疏爭不得又以江上兵

寡鄭鴻逵戰艦不還議更造檝九江僉事葉士彥於江

流截買材木士彥家蕪湖與諸商暱封還其檝繼咸以

令不行疏劾士彥士彥同年御史黃耳鼎亦劾繼咸言

繼咸有心腹將校勸左良玉立他宗良玉不從云良玉

嘗不拜監國詔聞之益疑懼上疏明與繼成無隙耳鼎受指使而言要典宜再焚江東人乃由是交口言繼成良玉倡和脅制朝廷矣會都下又有偽太子之事良玉爭不得遂與士英輩有隙繼成疏言太子真偽非臣所能懸揣真則望行良玉言偽則不妨從容審處多召東宮舊臣辨識以解中外之疑疏未達良玉已反初繼成聞李自成兵敗南下命部將郝效忠陳麟鄧林奇守九江自統副將汪碩畫李士元等援袁州防賊由岳州長

沙入江西境既已登舟聞良王反復還九江良王舟在

北岸貽書繼咸願握手一別為皇太子死九江士民泣

請繼咸往紓一方難繼咸會良王於舟中良王語及太

子下獄事大哭次日舟移南岸良王袖出皇太子密諭

劫諸將盟繼咸正色曰密諭何從來先帝舊德不可忘

今上新恩亦不可負密諭何從來良王色變良久乃曰

吾約不破城改檄為疏駐軍候旨繼咸歸集諸將於城

樓而灑泣曰兵諫非正晉陽之甲春秋惡之可同亂乎

遂約與俱拒守而效忠及部將張世勲等則已出與良
玉合兵入城殺掠繼咸聞之欲自盡黃樹入署拜泣曰
寧南無異圖公以死激成之大事去矣副將李士春亦
密白繼咸隱忍至前途王文成之事可圖也繼咸以為
然遂出責良玉良玉已疾篤夜望見城中火起大哭曰
予負臨侯臨侯繼咸別號也嘔血數升遂死其子夢庚
秘不發喪諸將推為帥移舟東中朝皆疑繼咸良玉同
反而南都時已破諸鎮多納款繼咸勸夢庚旋師不聽

遣人語林竒碩畫士元母為不忠事林竒碩畫士元避
皖湖中遣人陰逆繼咸繼咸已為效忠紹赴其軍將及
湖口而夢庚效忠降於我

大清遂執繼咸北去館內院至明年三月終不屈乃殺
之有張亮者四川人舉於鄉崇禎時歷榆林兵備參議
用薦改安廬兵備監禁軍討賊頗有功十七年擢右僉
都御史巡撫其地福王既立亮聞李自成兵敗西奔奏
言賊勢可乘請解職視賊所向督兵進討從之尋召入

京議事復遣還任明年四月左夢庚陷安慶亮被執夢
庚北行挾亮與俱乘間赴河死

金聲字正希休寧人好學工舉子業名傾一時崇禎元
年成進士授庶吉士明年十一月

大清兵逼都城聲慷慨乞面陳急務帝即召對平臺退
具疏言臣書生素矢忠義遭遇聖明日夜為陛下憂念
天下事今兵逼京畿不得不急為君父用夫通州昌平
都城左右翼宜戍以重兵而天津漕艘所聚尤宜亟防

今天下草澤之雄欲效用國家者不少在破格用之耳
臣所知申甫有將才臣願仗聖天子威靈與練敢戰士
為國家捍強敵惟陛下立賜裁許申甫者僧也好談兵
方私製戰車火器帝納聲言取其車入覽授都司僉書
即日召見奏對稱旨超擢副總兵招募新軍便宜從事
改聲御史參其軍甫倉猝募數千人皆市井游手所需
軍裝戎器又不時給而是時

大清兵在郊圻久勢當速戰急出營柳林總理滿桂節

制諸軍甫不肯為下桂卒掠民間甫軍捕之桂輒索去
聲以兩軍不和聞帝即命聲調護亡何桂歿甫連敗於
柳林大井乃結車營盧溝橋

大清兵遠出其後御車者惶懼不能轉殲戮殆盡甫亦
陣亡聲痛傷之言甫受事日淺直前衝鋒遺骸矢刃殆
徧非喋血力戰不至此帝亦傷之命予恤典聲恥無功
請率參將董大勝兵七百人甫遺將古壁兵百人及豪
傑義從數百人練成一旅為劉之綸奇兵收桑榆之效

不許俄以清核軍需告竣奏繳關防請按律定罪再疏

請罷斥皆不許東江自毛文龍被殺兵力弱勢孤聲因

東宮冊立自請頒詔朝鮮俾聯絡東江張海外形勢帝

雖嘉其意亦不果用尋上疏言陛下晝夜焦勞日親天

下之事實未嘗日習天下之人必使天下才不才及才

長短一一程量不爽方可斟酌位置往者陛下數召對

羣臣問無所得鮮當聖心遂厭薄之臣愚妄謂陛下泰

交尚未殷顧問尚未數不得謂召對無益也顧自今間

日御文華令京卿翰林臺諫及中行評博等官輪番入直博咨廣詢而內外有職業者亦得不時進見政事得失軍民利病廟堂舉錯邊塞情形皆與臣工考究於燕閒之間歲月既久品量畢呈諸臣才不才及才長短豈得逃聖鑒帝未及報聲再疏懇言之終不用遂屢疏乞歸後大學士徐光啟薦聲同修厯書辭不就以御史召亦不赴八年春起山東僉事復兩疏力辭鄉郡多盜聲團練義勇為捍禦十六年鳳陽總督馬士英遣使者李

章王徵貴州兵討賊迂道掠江西為樂平吏民所拒擊
比抵徽州境吏民以為賊率衆破走之章王諱激變謂
聲及徽州推官吳翔鳳主使士英以聞聲兩疏陳辨帝
察其無罪不問其年冬廷臣交薦即命召用促入都陛
見未赴而京師陷福王立於南京起擢聲左僉都御史
聲堅不起

大清兵破南京列郡望風迎降聲糾集士民保績溪黃
山分兵扼六嶺寧國邨祖德徽州溫璜貴池吳應箕等

多應之乃遣使通表唐王授聲右都御史兼兵部右侍郎總督諸道軍拔旌德寧國諸縣九月下旬徽故御史黃澍降於

大清

王師間道襲破之聲見執至江寧語門人江天一曰子有老母不可死對曰天一同公起兵可不同公殉義乎遂偕死唐王贈聲禮部尚書謚文毅天一歛諸生

邱祖德字念修成都人崇禎十年進士授寧國推官以

才調濟南用薦起擢僉事分巡東昌山東土寇猖獗帝
因給事中張元始言令祖德及東兗道李恪專任招撫
寇多解散十五年調官沂州其冬用兵部尚書張國維
薦擢右僉都御史巡撫保定十六年星察典解職候勘
事白以故官代王永吉撫山東京師覆賊遣使招降祖
德斬之謀發兵拒守會中軍梅應元叛率部卒索印祖
德乃南奔福王時御史沈宸荃劾祖德及河南總督黃
希憲輕棄封疆詔削籍提訊久之獲釋而成都亦陷無

家可歸流寓寧國金聲起兵績溪祖德與寧國舉人錢文龍諸生麻三衡沈壽堯等各舉兵應之時郡城已失祖德駐華陽三衡駐稽亭他蠱起者又十餘部約共攻郡城不克壽堯陣歿祖德退還山中

大清兵攻拔其寨被獲磔死其子亦死越四日三衡軍敗亦死壽堯都督有容子三衡布政使溶孫也三衡兵既起旁近吳太平阮恒阮善長劉鼎甲胡天球馮百家與俱起號七家軍皆諸生也三衡既敗太平等亦死温

璜初名以介字于石烏程人大學士體仁再從弟也母
陸守節被旌璜久為諸生有學行崇禎十六年秋舉進
士授徽州推官甫蒞任聞京師陷亟練民兵為保障計
明年南京亦覆知府秦祖襄及諸僚屬皆遁璜乃盡攝
其印召士民慰諭之金聲舉兵績溪璜與犄角且轉餉
給其軍而徙家屬於村民舍未幾聲敗璜嚴兵自守郡
中故御史黃澍以城獻璜趨歸村舍刃其妻茅氏及長
女遂自剄死吳應箕字次尾貴池人善今古文意氣橫

厲一世阮大鍼以附璫削籍僑居南京聯絡南北附璫
失職諸人劫持當道應箕與無錫顧杲桐城左國材蕪
湖沈士柱餘姚黃宗羲長洲楊廷樞等為留都防亂公
揭討之列名者百四十餘人皆復社諸生也後大鍼得
志謀殺周鏞應箕獨入獄護視大鍼聞急遣騎捕之應
箕夜亡去南都不守起兵應金聲敗走山中被獲慷慨
就死其同時舉兵者有尹民興吳漢超龐昌允謝球司
石磐王湛魯之璣民興字宣子崇禎初舉進士歷知寧

國涇二縣除奸釐盡有神明之稱行取入都為陳啟新
所訐謫福建按察司檢校十五年春疏陳時務十四事
帝喜召為職方主事數召對言多當帝意即擢本司郎
中周延儒出督師命從軍贊畫延儒被譴下民興吏除
名久之始釋福王立起故官尋謝病歸流寓涇縣南京
失與諸生趙初浣等據城拒守

大清兵攻破城初浣死之民興走免唐王以為御史事
敗歸卒於家漢超宣城諸生崇禎十七年聞都城變謀

募兵赴難會福王立乃已明年南都覆棄家走涇縣徙
尹民興起兵兵敗匿華陽山中先是邱祖德麻三衡諸
軍潰保華陽有徐淮者部署之漢超與合連取句容溧
水高淳溧陽涇太平諸縣明年正月襲寧國夜緣南城
登兵潰城中按首事者漢超已出城念母在且恐累族
人入見曰首事者我也剖其腹膽長三寸妻戚自擲樓
下死昌允西充人崇禎十年進士授青陽知縣南京覆
走匿九華山謀舉兵事洩被執夜死旅店中球溧陽諸

生僉事鼎新子也毀家募兵兵散被執而死石磐鹽城諸生與都司鄴某同舉兵兵敗被執鄴言此儒生吾劫之為書記耳石磐曰吾首事奈何諱之繫獄六十餘日與鄴偕死湛太倉諸生城已下與兄淳復集里人數百圍城城中兵出擊淳赴水死湛被斫死之璵歷官副總兵駐福山蘇州既降諸生陸世鑰聚衆焚城樓之璵率千人入城與

大清兵戰潰走之璵戰死其時以諸生死者有六合馬

純仁邳州王台輔南京既下六合即歸附純仁題銘橋
柱抱石投水死台輔當崇禎末聞宦官復出鎮將草疏
極諫甫入都都城陷乃還福王時東平伯劉澤清御史
王燮張樂大宴於睢寧台輔衰絰直入責之曰國破君
亡此公等卧薪嘗膽食不下咽時顧置酒大會即左右
欲鞭之燮曰狂生也命引去及南京覆台輔視其廩曰
此吾所樹盡此死明年粟盡北面再拜自縊死

沈猶龍字雲升松江華亭人萬曆四十四年進士除鄞

縣知縣天啟初徵授御史出為河南副使崇禎元年召

復故官進太僕少卿拜右僉都御史巡撫福建江西妖

賊張普薇等作亂猶龍遣遊擊黃斌卿協勦大破之增

秩賜金以憂歸服闋起兵部右侍郎兼右僉都御史總

督兩廣軍務兼廣東巡撫十七年冬福王召理部事不

就乞葬親歸明年南京失守列城望風下閩六月吳淞

總兵官吳志葵自海入江結水寨於泖湖會總兵官黃

蜚擁千艘自無錫至與合猶龍乃偕里人李待問章簡

等募壯士數千人守城與二將相犄角而參將侯承祖
守金山八月

大清兵至二將敗於春申浦城遂被圍未幾破猶龍士
走中矢死待問守東門簡守南門城破俱見殺華亭教
諭眭明永題詩明倫堂投繯死諸生戴泓赴池死嘉定
舉人傅凝之參志葵軍事兵敗赴水死

大清兵遂攻金山承祖與子世祿猶固守城既破巷戰
踰時世祿中四十矢被獲死之承祖亦被獲說之降不

從遂見殺志葵蜚既敗執至江陰城下令說城中人降
志葵說之蜚不語城迄不下後皆見殺待問字存我崇
禎未進士授中書舍人工文章兼精書法簡字坤能舉
於鄉官羅源知縣

陳子龍字卧子松江華亭人生有異才工舉子業兼治
詩賦古文取法魏晉駢體尤精妙崇禎十年進士選紹
興推官東陽諸生許都者副使達道孫也家富任俠好
施陰以兵法部勒賓客子弟思得一當子龍嘗薦諸上

官不用東陽令以私憾之適義烏奸人假中官名招兵
事發都葵母山中會者萬人或告監司王雄曰都反矣
雄遽遣使收捕都遂反旬日間聚衆數萬連陷東陽義
烏浦江遂逼郡城既而引去巡撫董象恒坐事逮代者
未至巡按御史左光先以撫標兵命子龍為監軍討之
稍有俘獲而遊擊蔣若來破其犯郡之兵都乃率餘卒
三千保南砦雄欲撫賊語子龍曰賊聚糧據險官軍不
能仰攻非曠日不克我兵萬人止五日糧奈何子龍曰

都舊識也請往察之乃單騎入都營責數其罪諭令歸
降待以不死遂挾都見雄復挾都走山中散遣其衆而
以二百人降光先與東陽令善竟斬都等六十餘人於
江許子龍爭不能得以定亂功擢兵科給事中命甫下
而京師陷乃事福王於南京其年六月言防江之策莫
過水師海舟議不可緩請專委兵部主事何剛訓練從
之太僕少卿馬紹愉奉使陞見語及陳新甲主款事王
曰如此新甲當恤廷臣無應者獨少詹事陳盟曰可因

命予恤且追罪嘗劾新甲者廷臣懲劉孔昭殿上相爭
事不敢言子龍與同官李清交章力諫事獲已未幾列
上防守要策請召還故尚書鄭三俊都御史易應昌房
可壯孫晉並可之又言中使四出搜巷凡有女之家黃
紙貼額持之而去閭井騷然明旨未經有司中使私自
搜採甚非法紀乃命禁訛傳誑惑者子龍又言中興之
主莫不身先士卒故能光復舊物今入國門再旬矣人
情泄沓無異昇平清歌漏舟之中痛飲焚屋之內臣不

知其所終其始皆起於姑息一二武臣以至凡百政令皆因循遵養臣甚為之寒心也亦不聽明年二月乞終養去子龍與同邑夏允彝皆負重名允彝死子龍念祖母年九十不忍割道為僧尋以受魯王部院職銜結太湖兵欲舉事事露就獲乘間投水死夏允彝字彝仲弱冠舉於鄉好古博學工屬文是時東林講席盛蘇州高才生張溥楊廷樞等慕之結文會名復社允彝與同邑陳子龍徐孚遠王光承等亦結幾社相應和崇禎十年

與子龍同成進士授長樂知縣善決疑獄他郡邑不能
決者上官多下長樂居五年邑大治吏部尚書鄭三俊
舉天下廉能知縣七人以允彞為首帝召見大臣方岳
貢等力稱其賢將特擢會丁母憂未及用北都變聞允
彞走謁尚書史可法與謀興復聞福王立乃還其年五
月擢吏部考功司主事疏請終制不赴御史徐復陽希
要人旨劾允彞及其同官文德翼居喪授職為非制以
兩人皆東林也兩人實未嘗赴官無可罪吏部尚書張

捷遽議貶秩調用未幾南都失徬徨山澤間欲有所為
聞友人侯峒曾黃淳耀徐汧等皆死乃以八月中賦絕
命詞自投深淵以死允彝死後二年子完淳兄之旭竝
以陳子龍獄詞連及亦死而同社徐孚遠舉於鄉因松
江破遁入海死於島中

侯峒曾字豫瞻嘉定縣人給事中震暘子也天啓五年
成進士授南京武選司主事丁父憂崇禎七年入都兵
部尚書張鳳翼薦為職方郎中峒曾力辭乃改南京文

選司主事由稽勲郎中遷江西提學參議給事中耿始
然督賦至他監司以屬禮見峒曾獨與抗禮益王勢方
熾歲試黜兩宗生王怒使人誚讓峒曾不為動遷廣東
副使不赴起浙江右參政分守嘉湖漕卒擊傷秀水知
縣李向中峒曾請於撫按捕戮首惡部內肅然吏部尚
書鄭三俊舉天下賢能監司五人峒曾與焉名為順天
府丞未赴而京師陷福王時用為左通政辭不就及南
京覆州縣多起兵自保嘉定士民推峒曾為倡偕里人

黃淳耀張錫眉董用圓馬元調唐全昌夏雲蛟等誓死固守

大清兵來攻峒曾乞師於吳淞總兵官吳志葵志葵遣遊擊蔡祥以七百人來赴一戰失利東甲遁外援遂絕城中矢石俱盡七月三日大雨城隅崩架巨木支之明日雨益甚城大崩

大清兵入峒曾拜家廟挈二子元演元潔竝沈於池錫眉用圓元調全昌雲蛟皆死之錫眉用圓皆舉人用圓

官秀水教諭元調全昌雲蛟竝諸生其時聚衆城守而死者有江陰閻應元崑山朱集璜之屬應元字麗亨順天通州人崇禎中為江陰典史十七年海賊顧三麻入黃田港應元往禦手射殺三人賊退以功遷英德主簿道阻不赴寓居江陰明年五月南京亡列城皆下閏六月朔諸生許用倡言守城遠近應者數萬人典史陳明遇主兵用徽人邵康公為將而前都司周瑞龍泊江口相犄角戰失利

大清兵逼城下徽人程璧盡散家貲充餉而身乞師於吳淞總兵官吳志葵志葵至璧遂不返康公戰不勝瑞龍水軍亦敗去明遇乃請應元入城屬以兵事

大清兵力攻城應元守甚固東平伯劉良佐用牛皮帳攻城東北城中用礮石力擊良佐乃移營十方庵令僧陳利害良佐旋策馬至應元誓以大義屹不動及松江破

大清兵來益衆四圍發大礮城中死傷無算猶固守八

月二十一日

大清兵從祥符寺後城入衆猶巷戰男婦投池井皆滿
明遇用皆舉家自焚應元赴水被曳出死之訓導馮厚
敦冠帶縊於明倫堂梯及妻王結粧投井死里居中書
舍人戚勳令妻及子女子婦先縊乃舉火自焚從死者
二十人舉人夏維新諸生王華呂九韶自刎死貢生黃
毓祺者好學有盛名精釋氏學與門人徐趨舉兵行塘
以應城內兵及城陷兩人逸去明年冬趨偵江陰無備

率壯士十四人襲之不克皆死毓祺既逸去避江北其

子大湛大洪被收兄弟方爭死而毓祺以敕印事發逮

繫江寧獄將刑其門人告之期命取襲衣自斂跌坐而

逝朱集璜字以發崑山貢生學行為鄉里所推教授弟

子數百人南京既亡崑山議拒守而縣丞閻茂才已遣

使迎降縣人共執殺茂才以六月望推舊將王佐才為

帥集璜及周室瑜琰陳大任等共舉兵參將陳宏勳

前知縣楊永言率壯士百人為助佐才亦邑人嘗官狼

山副總兵年老矣

大清兵至宏勛率舟師迎戰敗還遊擊孫志尹戰歿城
破永言遁去佐才縱民出走而已冠帶坐帥府見殺集
璜投東禪寺後河死門人孫道民張謙同日死室瑜琰
大任亦死之室瑜子朝鑛大任子思翰皆同死室瑜舉
於鄉官儀封知縣琰大任皆諸生時以守禦死者蘇達
道莊萬程陸世鏜陸雲將歸之甲周復培陸彥冲代父
死者沈徵憲朱國軾救母死者徐洺自盡者徐澂王在

中吳行貞

楊文驄字龍友貴陽人浙江參政師孔子萬厯末舉於鄉崇禎時官江寧知縣御史詹兆恒劾其貪污奪官候訊事未竟福王立於南京文驄威馬士英當國起兵部主事歷員外郎郎中皆監軍京口以金山踞大江中控制南北請築城以資守禦從之文驄善書有文藻好交遊干士英者多緣以進其為人豪俠自喜頗推獎名士士亦以此附之明年遷兵備副使分巡常鎮二府監大

將鄭鴻逵鄭彩軍及

大清兵臨江文驄駐金山扼大江而守五月朔擢右僉
都御史巡撫其地兼督沿海諸軍文驄乃還駐京口合
鴻逵等兵南岸與

大清兵隔江相持

大清兵編大筏置燈火夜放之中流南岸軍發礮石以
為克敵也日奏捷初九日

大清兵乘霧潛濟迫岸諸軍始知倉皇列陣甘露寺鐵

騎衝之悉潰文驄走蘇州十三日

大清兵破南京百官盡降命鴻臚丞黃家鼎往蘇州安撫文驄襲殺之遂走處州時唐王已自立於福州矣初唐王在鎮江時與文驄交好至是文驄遣使奉表稱賀鴻達又數薦乃拜兵部右侍郎兼右僉都御史提督軍務令圖南京加其子鼎卿左都督太子太保鼎卿士英甥也士英遣迎福王遇王於淮安王貧婁甚鼎卿賂給之王與定布衣交以故寵鼎卿甚及鼎卿上謁王以故

人子遇之獎其父子擬以漢朝大小耿然其父子以士
英故多為人詆譏明年衢州告急誠意伯劉孔昭亦駐
處州王令文驄與共援衢七月

大清兵至文驄不能禦退至浦城為追騎所獲與監紀
孫臨俱不降就戮臨字武公桐城人兵部侍郎晉之弟
文驄招入幕奏為職方主事竟與同死其時起兵旁掠
郡縣者有吳易字日生吳江人生有膂力跡弛不羈崇
禎未成進士福王時謁史可法於揚州可法異其才題

授職方主事為已監軍明年奉檄徵餉江南未還而揚
州失已而吳江亦失易走太湖與同邑舉人孫兆奎諸
生沈自駟自炳武進吳福之等謀舉兵旬日得千餘人
屯於長白蕩出沒旁近諸縣道路為梗唐王聞之授兵
部右侍郎兼右僉都御史總督江南諸軍文驄奏易斬
獲多進為兵部尚書魯王亦授易兵部侍郎封長興伯
八月

大清兵至易遂敗走父承緒妻沈及女皆投水死自駟

自炳福之亦死焉兆奎就獲一軍盡殲明年易鄉人周瑞復聚衆長白蕩迎易入其營八月事洩就獲死之福之鍾巒子也兆奎兵敗時慮易妻女被辱視其死而後行故見獲械至江寧死之

陳潛夫字元倩錢塘人家貧落魄好大言以駭俗崇禎九年舉於鄉益廣交遊為豪舉好臧否人里中人惡之友人陸培兄弟為文逐潛夫潛夫乃避居華亭十六年冬授開府推官大河南五郡盡為賊據開封被河灌城

虛無人長吏皆寄居封邱有勸潛夫弗往者不聽馳之
封邱會叛將陳永福率賊兵出山西其子德為巡撫秦
所式部將縛巡按御史蘇京去潛夫募民兵干請於所
式及總兵卜從善許定國令共勦皆不肯行潛夫乃以
十七年正月奉周王渡河居杞縣檄召附近長吏設高
皇帝位歃血誓固守賊所設偽巡撫梁啟隆居開封他
偽官散布郡邑間甚衆而開封東西諸土寨剽掠公行
相攻殺無已潛夫轉側杞陳留間朝夕不自保聞西平

寨副將劉起洪勇而好義屢殺賊有功躬住說之五月
五日方誓師而都城失守報至乃慟哭令其下縞素洪
起兵萬號五萬潛夫兵三千俘祀偽官啟隆聞風遁去
遂渡河而北大破賊將陳德於柳園時李自成已敗走
山西而南陽賊乘間犯西平洪起引還潛夫亦隨而南
福王立南京潛夫傳露布至朝中大喜即擢監軍御史
巡按河南潛夫乃入朝言中興在進取王業不偏安山
東河南地尺寸不可棄豪傑結寨自固者引領待官軍

誠分命藩鎮以一軍出潁壽一軍出淮徐則衆心競奮

爭為我用更頒爵賞鼓舞計遠近畫城堡俾自守而我

督撫將帥屯銳師要害以策應之寬則耕屯為食急則

披甲乘墉一方有警前後救援長河不足守也汴梁一

路臣聯絡素定旬日可集十餘萬人誠稍給糗糧容臣

自將臣當荷戈先驅諸藩鎮為後勁河南五郡可盡復

五郡既復畫河為固南連荆楚西控秦關北臨趙衛上

之則恢復可望下之則江淮永安此今日至計也兩淮

之上何事多兵督撫紛紜竝為虛設若不思外拒專事
退守舉土地甲兵之衆致之他人臣恐江淮亦未可保
也當是時開封汝寧間列寨百數洪起最大南陽列寨
數十蕭應訓最大洛陽列寨亦數十李際遇最大諸帥
中獨洪起欲效忠潛夫請予掛印為將軍馬士英不聽
而用其姻婭越其杰巡撫河南潛夫自九月入覲便道
省親甫五日即馳赴河上所建白皆不用諸鎮兵無至
者其杰老憊不知兵兵部尚書張縉彥總督河南山東

軍務止提空名不能馭諸將其冬應訓復南陽及泌陽
舞陽桐柏遣子三傑獻捷潛夫授告身飲之酒鼓吹旌
旗前導出三傑喜過望往謁其杰其杰故為尊嚴厲辭
詰責誠為賊三傑泣而出萌異心潛夫過諸寨皆饒吹
送迎其杰間過之諸寨皆閉門不出其杰恚譖潛夫於
士英士英怒冬盡召潛夫還以凌駟代潛夫亦遭外艱
歸明年三月給事中林有本疏劾御史彭遇颯竝及潛
夫士英以遇颯已私人置不問獨令議潛夫罪先是有

童氏者自言福王繼妃廣昌伯劉良佐具禮送之潛夫
至壽州見車馬騶從傳呼皇后來亦稱臣朝謁及童氏
入都王以為假冒下之獄遂責潛夫私謁妖婦逮下獄
治之未幾南都不守潛夫得脫歸聞魯王監國紹興渡
江往謁命復故官加太僕少卿監軍乃自募三百人列
榮江上尋進大理寺少卿兼御史如故

順治三年五月晦江上師盡潰潛夫走至山陰化龍橋
偕妻妾二孟氏同赴水死年三十七始為文遂潛夫者

陸培字鯤庭舉進士為行人奉使事竣歸省南京既覆
聞潞王又降以繩授二僕從容就縊而死年二十九培
少負俊才有文名行誼修謹客華亭嘗却奔女於室云
沈廷揚字季明崇明人好談經濟崇禎中由國子生為
內閣中書舍人十二年冬帝以山東多警運道時梗議
復海運廷揚生海濱習水道上疏極言其便且輯海運
書五卷以呈帝喜即命造海舟試之廷揚乘二舟由淮
安出海抵天津僅半月帝大喜即加戶部郎中往登州

與巡撫徐人龍計海運事初寧遠軍餉率用天津船自
登州候東南風轉粟至天津又候西南風轉至寧遠廷
揚請從登州直達寧遠帝用其議省費多十五年命再
赴淮安督海運事竣加光祿少卿仍領其事及京師陷
福王命廷揚以海舟防江尋命兼理餉務餽江北諸軍
南京失守走還鄉里後航海至舟山依黃斌卿唐王在
福建授兵部右侍郎總督水師魯王授官亦如之魯王
航海之明年廷揚督舟師北上抵福山次鹿苑夜分颶

風大作舟膠於沙為

大清兵所執諭之降不從乃就戮

林汝翥字大歲福清人舉於鄉授沛縣知縣天啟二年
戰却徐鴻儒兵緝妖人王普光黨有功特擢御史四年
六月巡視京城民曹大妻與人奴角口服毒死火者曹
進傳國興率衆大掠奴主家用大錐錐其主刑官不敢
問汝翥捕得進進懼劾請受杖遂杖之五十國興邀於
道罵不已汝翥收繫之亦請受杖復杖之魏忠賢大怒

立傳旨廷杖汝翥先數日羣奄毆殺萬璟汝翥大懼逸
至遵化巡撫鄧漢為代題都御史孫瑋御史潘雲翼等
交章論救不聽卒杖之削籍歸崇禎初起官右參議分
守溫處道不赴久之起瓊州道坐奸民煽亂貶秩歸福
王時起雲南僉事已而解職魯王次長垣召為兵部右
侍郎與員外郎林塗攻福寧戰敗就執諭降不從繫之
吞金屑而死塗字子野汝翥同邑人崇禎十六年進士
授海寧知縣邑有妖人以劍術惑眾聚千人塗捕殺之

南都覆杭州亦不守卒乘機乞餉環署大譟空罪為首者而如其請以城孤不能存引去唐王以為御史改文選員外郎募兵福寧聞王被殺大慟走匿山中及魯王航海至長垣福清鄉兵請空為主與汝蕭共攻城歿於陣

鄭為虹字天王江都人崇禎十六年進士除浦城知縣唐王道浦城知其廉及自立召為御史部民相率乞留有十不可去之疏乃令以御史巡視仙霞關駐浦城尋

令巡撫上遊四府兼顧關務鄭芝龍步將奪民舟為虹叱責之芝龍訴於王王為諭解然是時芝龍已懷異志盡撤守關將仙霞嶺二百里間無一人

順治三年八月

大清兵長驅直入為虹亟還浦城縱士民出走自守空城無何就執與給事中黃大鵬並死之年二十有五大鵬字文若建陽人崇禎十三年進士為義烏知縣有能聲唐王召為兵科給事中從至建寧令與為虹共守仙

霞嶺竟同死時王在延平聞仙霞關失守倉猝走汀州
守延平者為王士和從走汀州者有胡上琛熊緯皆以
死事著士和字萬育金谿人崇禎中舉於鄉南京既覆
江西亦被兵士和避入閩授吏部司務疏陳時政闕失
凡數千言唐王刊賜文武諸臣且召士和入對嘉獎備
至擢兵部主事未一月擢延平知府八月王走汀州留
兵部侍郎曹履泰偕士和居守俄警報疊至士和召父
老曰吾雖一月郡守當與城存亡若等可速出毋使數

萬生靈盡膏斧鎖衆泣士和亦泣退入內署謂友人曰
吾一介書生數月而忝二千石安敢偷生其友勸止之
正色曰君子愛人以德姑息何為從容正衣冠閉戶投
繯死上琛字席公世襲福州右衛指揮使好讀書能詩
既襲職後舉武鄉試唐王時官錦衣衛指揮遷署都督
僉事充御營總兵官從至汀州王見執上琛奔還福州
謂家人曰吾世臣不可苟活為我採毒草來妾劉年二
十願同死上琛喜曰汝幼婦亦能死耶遂整冠帶與妾

共飲藥酒而卒緯字文江南昌人崇禎十六年進士授
行人南京既覆每飲酒輒涕泗交橫下友人語之曰昔
狼曠有言吾未獲死所子既有志曷求所乎乃赴延平
謁唐王擢給事中尋扈行至汀州遭變從官皆散緯仍
奔赴遇

大清兵死之

贊曰廢興之故豈非天命哉金聲等以烏合之師張皇
奮呼欲挽明祚於已廢之後心離勢渙敗不旋踵何尺

寸之能補然卒能致命遂志視死如歸事雖無成亦存其志而已矣

明史卷二百七十七

欽定四庫全書

明史卷二百七十七考證

袁繼成傳彛憲大志與繼成互訐奏

臣嚴福按彛憲

奏辭謂覲官叅謁乃尊朝廷繼成復言尊朝廷莫大於典例知府見藩臬行屬禮典例也見內臣行屬禮亦典例乎諸司至京投冊吏部典例也先謁內臣亦典例子事本典例雖坐受猶以為安事創彛憲即長揖祇增其辱高皇帝立法內臣不得與外事若必以

內臣繩外臣會典所不載上仍切責之見通鑑紀事
謹附考

邱祖德傳行取入都為陳啟新所訐謫福建按察司檢
校 臣嚴福按十二年陳啟新疏論考選又進吏部
訪冊禮部尚書姜逢元兵部尚書王業浩獨園多上
嫌其濫俱罷官啟新遂叅知縣尹民興等俱降調見
通鑑紀事謹附考

陳潛夫傳陸培字庭鯤舉進士

臣嚴福按培仁和人

崇禎十三年進士見題名錄謹附考

林汝翥傳廷杖汝翥

臣

嚴福按汝翥與大學士葉向高

同鄉魏忠賢欲借之以傾向高會汝翥以廷杖逸去
羣奄疑向高匿之索其寓辱及婦女向高奏之置不
問見通鑑紀事謹附考

附明史卷二百七十七考証後

乾隆四十一年

賜諡諸臣

素繼成 專諡忠毅

陳子龍 專諡忠裕

邱祖德 溫璜 沈猶龍 侯承祖 閻應元

鄭為虹

以上通諡忠烈

胡上琛

以上通諡節愍



總校官編修臣吳紹潔